

隣水縣志

卷五

隣水縣志卷之五

目錄

人物志

僑寓

老釋

封蔭

誥勅

坊墓

藝文志

奏疏

碑記

序文

隣水縣志

卷之五目錄

首

隣水縣志卷之五

人物志

僑寓

邑間有君子至止清標所樹林壑爲之生色譬之空谷  
蘭桂自然醖醇也陳杜舊祇書名茲照他志增敘履歷  
使閱者知其梗概焉

唐

陳子昂字伯玉射洪人舉進士武后時拜麟臺正字遷右  
拾遺時吐蕃入寇議開蜀山剪生羗以襲吐蕃子昂上

隣水縣志

卷之五 僑寓

一

書武攸宜怒徒署軍曹聖歷初以父老解組歸養曾遷  
居廣安州之岳門鎮有讀書臺因後人七世同居建孝  
義臺後居鄰壑流盃池宴客及父喪廬塚次射洪令段  
簡貪暴聞其富捕繫獄而死人哀惜之年四十二

杜甫字子美襄陽人先世徙河南鞏縣天寶中獻三大禮  
賦明皇竒之授率府胄曹京師亂徒步謁行在授左拾  
遺以直言出爲華州司功遷京兆功曹劔南道節度使  
嚴武以爲工部員外郎叅謀軍事上元元年卜居成都  
西郭澣花溪上曾居閬中後居鄰水岩壁刻書巖二字

今成古蹟後扁舟南下依夔州至荆楚以疾卒年五十

九

明

雪菴和尚名守牧字懶牛不知何許人臨寂徒問之曰松陽攷建文時松陽地乃葉希賢也官御史帝遜位走蜀歷巴邑寓邑善慶里白龍洞松栢灘結菴誦周易聞者以爲佛經或往視之則易經乾卦又嗜楚詞日袖一卷登舟中流朗誦誦一頁輒投一頁於水中投已輒哭哭已復誦終卷乃已有詩載藝文

## 隣水縣志

卷之五 僑寓

二

程濟朝邑人官岳池教諭精術數曾密奏某月日北方兵起帝將誅之請囚後果驗擢編修兵入得太祖遺篋有僧具遂爲帝祝髮從之入蜀至邑善慶里杜景賢構寺居之與雪菴夜話達旦贈詩送帝至京入大內泣別不知所往

孔希瑤山東曲阜人幼負大志有高才能文建文時憫憂時事遊學之蜀卽邑進士孔宏頤祖也

張琅遂寧人明末賊亂攜家來鄰寓陳三臺家生子鵬翮平定後回籍子官至大學士

周文甲順治時舉人由楚入川牟家坪有墓碑

隣水縣志

卷之五 僑寓

三

老釋 女釋附

劉向列仙傳云自古得仙者百六十二人其七十二人在佛經是釋與道並非吳越且釋由道出有內典可據溯其本原利物濟人總歸自治而已迨至末流泥於飛昇超度之說而二氏始爲人心風俗之害然僧道中有一塵不染萬象俱空至于數十年之久則亦頗著靈蹟所謂惟天下之靜者乃能見微而知著也特非身居紅塵者所能盡其功卽僧道無堅忍之力亦不能盡其功故高僧高道猶且曠世而或有何況世塵中人此所以

隣水縣志

卷之五 老釋

四

信佛學道者衆而卒未聞有成功也鄰邑道士甚少止傳有高僧數人閱者但溯其雲瓢烟笠時無罣無碍瀟灑出塵良可爲薰心富貴利達者下一針砭

明

無際禪師挂錫海寶山結菴修道菴前一池中有蓮一莖內盛水如珠苦行二十餘年得道昇去後人獵於山中言其蹟尙存有心訪之徧尋不遇

不二禪師無際徒也通小乘法知未來事釋語錄記上召無際入京將行不二請曰玉殿氍褥不可履也下有乘

法御賜清茗不可盡飲當沃之以救吳災無際詣闕如  
言而行啟瓊視之果有經卷覆手中茗後果有馳報吳  
有火災得黃雨而滅其焰云

西懷禪師髫年削髮朝四山通三教隱居海寶悟上乘禪  
受法於天童頂無際二十五代派圓寂時命衆僧積薪  
十乘是日曳杖就焚月餘有客遇於楚鄢郢間卽脫化  
時也

僧南宗嘉靖時人結菴于華銀山有大白果樹忽枯祝曰  
如南宗興樹復茂月餘如其言四方緇侶杖錫來游不

## 隣水縣志

卷之五 老釋

五

下數千僧以山高水遠艱于負汲爲患忽一日有虎遶  
院長嘯者三衆僧大駭宗命各擲隻履於戶外祝曰與  
爾有夙債者卽將履去願償不辭明日徧視惟失宗履  
踪跡之見履遺寺後俯躬拾取忽聞洶洶水聲伏流地  
下掘之得水清甘至今得免負汲之苦

普賢真人卓錫華銀山成道

國朝

僧心德號大志明崇禎七年由貴州至長壽說法菩提山  
康熙七年修東香寺人問監廟期志曰但聞木樵聲便

是某夜榆聲聞三十里次早廟立工人欲志飲食志曰  
僧本戒殺但修廟勝事今夜大風休驚懼潛窺後果得  
死豕一隻工喜曰此雖天賜豈無法力哉十五年圓寂  
隣人遇於葛蘭橋問何往答以朝南海又囑以倉鑰所  
在隣人至寺見樞正尋倉鑰如其言果得之

僧性天居龍陀寺有智慧往朝南海回途遇一人至聖水  
寺別贈一扇內云三教原來無根傳然何生下泥一團  
身居牟尼三寶地足登沙界極樂天囑曰俟祈雨時開  
扇性天在途忽開果天雨驟至未及收扇破後乃知爲

## 隣水縣志

卷之五 老釋

六

聖水寺龍王贈也里人遇旱往聖水寺求雨多應龍陀  
寺來求尤應俗傳聖水服龍陀云

僧本寬住持碧雲菴中能作詩嘗與名士往來志高行潔  
幾有五代齊己之風焉

## 女釋

雪菴真女姓殷氏生而茹素長不願許嫁父母不聽適比  
鄰陳氏合昏夜室有蛇蟒之異陳氏以爲不祥舁之歸  
遂繡佛長齋後與鄉中老嫗朝南海禮佛畢買舟歸忽  
真女不見及鄉嫗歸先有銅佛三尊飛落殷氏山上始



知其飛昇也築祠祀之設銅佛於祠內後被里匪竊毀  
鑄錢尋之獲其元控之官昇歸城東延福寺配成大士  
象今殷家寺猶塑真女像祀焉

## 隣水縣志

卷之五 封贈

七

### 封贈

龍章寵錫鳳軸光崇所以上慰貽燕之心下紓顯揚之  
志也勗忠勗孝於是乎在故自三品以上封贈二代誥  
命三軸四品五品應封一代誥命二軸六品七品應封  
一代勅命二軸俱准將本身妻室封典勑封其祖父母  
八品九品封本身妻室勑命一軸准勑封其父母內官  
准加級請封外官准捐級請封命婦因子孫封者並加  
太字若已故或曾祖父父在及勑封則不加凡此錫類  
之典並足以垂不匱云

明

楊純 正四品成化間

誥授中憲大夫陝西按察使司副使

談倫 正四品宏治間

誥授中憲大夫廣東潮州府知府

劉涑 以子三才正六品萬歷間

勅封承直郎湖廣襄陽府推官妻甘氏贈太安人

甘一桂 以子學濶從二品崇禎間

誥授通中大夫陝西巡撫妻夏氏太夫人

隣水縣志

卷之五 封贈

八

馮伯器 以孫從龍從三品天啟間

誥贈階中大夫廣東布政使司右叅政妻李氏贈太淑

人

馮守階 以子從龍貴

誥贈階中大夫廣東布政使司左叅政妻劉氏贈太淑

人

馮從龍

誥授階中大夫原任廣東布政使司右叅政妻趙氏繼

妻朱氏俱淑人

楊芳春 生員以子一僑正八品崇禎間

勅贈文林郎湖廣景陵縣知縣妻胡氏封太孺人

國朝

楊曦垣以子伯龍貴乾隆二年

勅贈文林郎山西隰州大寧縣知縣妻廖氏贈太孺人

楊伯龍

勅授文林郎妻羅氏繼妻張氏俱贈孺人

杜之茂以子需材貴乾隆元年

隣水縣志

卷之五 封贈

九

勅贈徵仕郎山東東昌府高唐州州判妻夏氏贈太孺人

杜需材

勅授徵仕郎妻劉氏繼妻甘氏俱封孺人

楊宗美以子崇貴乾隆十六年

勅贈修職郎四川夔州府奉節縣教諭妻孟氏贈孺人

陳元貞以孫加儒貴乾隆十六年

勅贈文林郎浙江處州府宣平縣知縣妻馮氏贈孺人

陳漢棟以子加儒貴

勅封文林郎浙江處州府宣平縣知縣妻包氏贈孺人

張仕美以曾孫德化貴捐級請乾隆四十二年

貤贈文林郎直隸冀州武邑縣知縣妻陳氏贈孺人

張萬瓊以孫德化貴

貤贈文林郎直隸冀州武邑縣知縣妻唐氏贈孺人

張加意以子德化貴

勅封文林郎直隸冀州武邑縣知縣妻劉氏封孺人

甘克綏以孫文林貴

貤贈文林郎廣東肇慶府廣寧縣知縣妻彭氏贈孺人

甘存德以子文林貴

### 隣水縣志

卷之五 封贈

十

勅封文林郎廣東肇慶府廣寧縣知縣妻劉氏贈太孺人以

孫采和貴例晉

貤贈朝議大夫河南衛輝府知府劉氏恭人

甘文林以子采和貴

例贈朝議大夫河南衛輝府知府妻王氏潘氏俱封恭人

馮天玫以孫學颺貴乾隆四十五年

貤贈文林郎山東濟南府德平縣知縣妻陳氏贈孺人嗣援

同知例捐請

貤贈奉直大夫陳氏宜人

馮開疆以子學颺貴

勅贈文林郎山東濟南府德平縣知縣妻張氏贈太孺人嗣  
援同知例誥贈如前天玫銜

甘克臚以曾孫家斌貴例

貤贈通奉大夫大理寺卿加一級妻王氏贈夫人

甘存書以孫家斌貴嘉慶元年正月

貤贈奉直大夫刑部奉天司主事加一級妻會氏贈宜人十  
四年

貤贈奉政大夫刑部員外郎加一級曾氏宜人例晉

### 隣水縣志

卷之五 封贈

十一

誥贈通奉大夫大理寺卿加一級曾氏夫人

甘道徹以子家斌貴

誥封奉直大夫刑部奉天司主事加一級妻廖氏贈太宜人  
十四年例晉如前存書銜

甘家泰以弟家斌貴嘉慶四年四月

貤封奉直大夫刑部陝西司主事加一級

甘家斌本身嘉慶四年九月

誥授奉直大夫妻錢氏繼室馬氏俱封宜人十四年正月  
誥授奉政大夫錢氏贈宜人馬氏封宜人例晉如前

廖良碧以曾孫寅貴例

貤贈中議大夫兩淮都轉鹽運使司鹽運使妻梅氏贈淑人  
廖忠謨以孫寅貴嘉慶十四年

貤贈中憲大夫江西吉南贛寧兵備道妻馮氏贈恭人例  
誥贈中議大夫兩淮都轉鹽運使司鹽運使馮氏淑人

廖忠誥以本生孫寅貴

貤贈中憲大夫江西吉南贛寧兵備道妻杜氏贈恭人例  
誥授中議大夫兩淮都轉鹽運使司鹽運使杜氏淑人

廖貞泰以子寅貴

### 隣水縣志

卷之五 封贈

十二

誥贈中憲大夫江西吉南贛寧兵備道妻劉氏贈太恭人例  
晉如前忠謨銜

屈大儒以孫鳴介貴

貤贈文林郎浙江杭州府昌化縣知縣妻李氏贈孺人  
屈光華以子鳴介貴

勅贈文林郎浙江杭州府昌化縣知縣妻楊氏贈太孺人  
廖思芳以子均貴例

誥贈中憲大夫分巡江寧整飭江南鹽法道妻熊氏封太恭  
人

屈光宗以孫澤霖貴

勅贈文林郎廣東肇慶府恩平縣知縣妻龔氏贈太孺人

屈明畧以子澤霖貴

勅贈文林郎廣東肇慶府思平縣知縣妻夏氏贈孺人

劉良明以子義遵貴

贈修職郎四川雅州府蘆山縣教諭妻黃氏孺人

馮大科以子成範貴

贈修職佐郎四川酉陽州秀山縣訓導妻甘氏孺人

汪應亨以子翹儀貴

### 隣水縣志

卷之五 封贈

十三

贈修職佐郎四川敘州府宜賓縣教諭妻甘氏孺人

馮開慤以子學謨貴

贈修職佐郎潼川府射洪縣訓導妻杜氏孺人

唐 以子昱貴

贈修職佐郎成都府彭縣訓導妻 氏孺人

陳文賢以子丙吉貴嘉慶十四年正月

贈登仕佐郎湖南桂陽州藍山縣大橋司巡檢妻馮氏孺人

誥勅

明

封贈參政馮從龍之祖父母

制曰帝王御宇必有岳牧佐命之良臣子奮庸不忘水源木本之報凡以樹人者不易醞之數世乃蒸爲國乘於以闡幽者甚隆酬比膚功爰推其家學爾馮伯器迺原任廣東布政使司右參政馮從龍祖父木雞自珍干將未試邱園陋束帛之賁謬有松下風橘柚謝羽翼之媒矯矯若雲間鶴文正之恤里賑族仲連之排難解

隣水縣志

卷之五 誥勅

十四

紛代輸惟恐人知折券非以市義宜其驕驩之種千里爲駒鳳凰之占三世振采載攷聞孫之剔應一皆念祖之栽培是用贈爾階中大夫廣東布政使司右參政汶江福派知衍慶於無窮眉嶽高標共挹清於不朽制曰國渥殊恩所以自義而率祖闔彰懿德所以致孝而作忠稽古永錫類之施必究嗣徽音之始爾李氏乃原任廣東布政使司右參政馮從龍之祖母家人之貞闔門之秀嘒嘒秉禮寧止無非無儀矻矻佐籌實木克勤克儉未富而好行其德樂施而不有其名卽此偕隱



鹿門相夫子已作士林之師表雖其早登鶴馭遺女誠堪爲百世之楷模所以桂實連雲蘭孫承露蔭八方而植榦更三葉而垂榮是用贈爲淑人絲綸起玉壘之香魂禕萸儼錦江之春色

加贈馮從龍之父母天啟時

制曰雲霄聳榦恒托根於崇阿濱渤紫瀾每發源乎月窟況乎邦國之楨蒼生之潤自非包孕甚竒淳泓有本安能撐任時艱斟酌元化哉爾贈承德郎兵部武選清吏司主事馮守階乃原任廣東布政使司右叅政馮從

隣水縣志

卷之五 誥勅

十五

龍之父抱璞而不剖埋照以獨醒天植友子人推孝格守柰瑯琳之至性感荆田氏之遺風淡於世營時銳義方之訓克承先志永思敦睦之仁居然熙朝之三老五更寧非往代之四皓六逸光閭有子列屏翰於王家肯構後人策丹艧於天府是用加贈爾階中大夫廣東布政使司右叅政於戲鶴歸華表尙知琬瑾流光鳳下彤廷必使几筵生色

制曰女之四德三從雖不出閨闈而世訓則卓然可卜今之國恩家慶雖無加菽水而祿養則顯被無窮欲令

資事父等於以事君固知非是母不能有此子爾封太  
安人劉氏乃原任廣東布政使司右叅政馮從龍之母  
盛德藹乎若蘭天性溫其如玉起敬不違事嚴姑而不  
以爲苦力勤無倦相隱君而無改其操水圓折以流光  
蚌胎在握于秩斯而兼守熊夢有徵闔以內肅肅雍雍  
昔相杼機之訓勉車之間鏘鏘噦噦今看緯策之寵榮  
是用加封爾爲太淑人以表江沱有光婺女期有譽於  
天爵克昌後乎天衢  
誥授馮從龍本身妻室

## 隣水縣志

卷之五 誥勅

十六

制曰保釐允於東土价人維藩文武憲于萬邦明命使  
賦報慶則圭瓚以賜策勛則車服以庸苟有利於四封  
復何靳於三錫爾原任廣東布政使司右叅政馮從龍  
戴井絡而注福星映銅梁而分光岳蜚英廷對奉職使  
垣勤勞數載之軒輶飽閱四方之宜便洎粉署含春之  
直無忝下官迨霜臺榮戟之威煦如冬日南土凋<sub>起</sub>之  
握節東陞軍旅之轉輸島<sub>船</sub>之梟張靡弗蝟縮鹽筴之  
蔑滯罔不冰清如理亂絲操刀必割若行流水國脉俱  
通慰嶺表之來蘓思海邦於去後茲以覃思授爾階中

大夫錫之誥命朕方今晉爾廉訪伏節西陲賀蘭山下  
揣毳帳之逼窺花鳥池邊驚羽書之沓至多緣鎮戍之  
虛空每索撫賞之爲難何以密僨梁而塞其瑕何以嚴  
講析而奪其氣倘資籌海之畧以爲靖塞之勛卽此股  
肱之忠勤不負心膂之倚託壯猷自勉簡任方隆欽哉  
制曰婦從一而終必以盡道女正位乎內安藉人知故  
有獲宜家之賢而不享偕老之福者此縉紳追念糟糠  
所以抱遺簪之感而國家恩覃窀穸所以申奠爾之命  
也爾原任廣東布政使司右叅政馮從龍妻封安人趙

## 隣水縣志

卷之五 誥勅

十七

氏淑慎其儀柔嘉維則相夫子以敬奉翁姑以孝闔門  
之激勉者已多年雞鳴之詠誠者如一日勸人行善卽  
規世之慈航茹素心甘洵宦門之淨土就今日旬宣之  
美遐思舉案之得人卜他日嗣續之賢更識授詩之有  
母備表榮於存歿從爵寵以始終是用加贈爾爲淑人  
欽茲渥典以勸幽貞永載綸音流徽彤管  
制曰閨闈之良原有相成之誼室家之慶宜均載錫之  
光卽月當弦望亦借以同照也爾原任廣東布政使司  
右叅政馮從龍繼室朱氏出自鼎族佐我棟臣蓁葉灼

華早叶宜家之咏蘋沼繫汴用彰中饋之能馳驅皇路者無牀第之懷安笙鏞盛世者先琴瑟之靜好香含華而自茹玉叶韞而愈光何靳左右之六珈以令後先之雙璧是用封爾爲淑人尙資窈窕承贊忠良用保寵綏母廢配命

封贈楊一儁之父母崇禎時

制曰士有含章沒齒席珍弗貢於明廷而式穀流輝製錦分榮於上邑朕即以其官官之與躬逢何異焉爾生員楊芳春乃湖廣承天府景陵縣知縣楊一儁之父廉

隣水縣志

卷之五 誥勅

十八

隅自矢瞻視非常非公挹不至之高克友樹孔懷之範溱竒吐鳳困鵬翼於搏風價擅登龍嚴鯉趨於學禮嘉此詒燕可緩寵嘉甫釋褐而念所生睠首科而頒渥典是用贈爾爲文林郎景陵縣知縣臣子異數初邀綸綍之榮朝廷作忠永耀松楸之賁

制曰母氏劬勞詩所以懷罔極也况樹節植孤克昌厥後衍箕裘而光弓冶可謂壽母燕賀矣爾胡氏乃湖廣承天府景陵縣知縣楊一儁之生母雍肅作儀柔嘉維則持家盡瘁雅同桓汲之勤相土蜚英夙勵樂機之勸

鸞鏡含酸於中道熊丸聿啟乎後人是用封爾爲大孺  
人花縣春光初沐自天之寵北堂晝永益瞻愛日之誠  
國朝

封贈楊伯龍之父母乾隆二年

制曰求治在親民之吏端重循良教忠勵資敬之忱聿隆  
褒獎爾楊曦垣乃山西隰州大寧縣知縣楊伯龍之父  
裊躬淳厚垂訓端嚴業可開先式穀乃宣猷之本澤堪  
啟後貽謀裕作牧之方茲以覃恩贈爾爲文林郎山西  
隰州大寧縣知縣錫之勅命於戲克承清白之風嘉茲

## 隰水縣志

卷之五 封贈

十九

報政用慰顯揚之志昭乃遺謨

制曰朝廷重民社之司功推循吏臣子凜冰淵之操教本  
慈闈爾山西隰州大寧縣知縣楊伯龍之母廖氏淑慎  
其儀柔嘉維則宣訓詞於朝夕不忘育子之勤集慶澤  
於門閭式被自天之寵茲以覃恩贈爾爲孺人於戲仰  
酬顧復之恩勉思撫字載煥絲綸之色永賁幽潛

勅授楊伯龍本身妻室

制曰分符百里必遴出宰之材報最二年爰重懋官之選  
爾山西隰州大寧縣知縣楊□龍雅擅才能克宣慈惠

撫綏有要常深疾痛在己之心懷保無窮不忘顧復斯民之責茲以覃恩授爾爲文林郎錫之勅命於戲前勞已茂用褒製錦之能來軫方邁益勵飲水之操

制曰良臣宣力於外効厥勤勞賢媛襄職於中膺茲寵錫爾山西隰州大寧縣知縣楊伯龍之妻羅氏終溫且惠既靜而專綦縞從夫克贊素絲之節蘋蘩主饋爰流彤管之徽茲以覃恩贈爾爲孺人於戲敬爾有官著肅雍而并美職司共內昭淑慎之遺徽

制曰在公必敬臣心每待助於閨闈齊體維均國典必疏

## 隣水縣志

卷之五 封贈

二十

榮於繼續爾山西隰州大寧縣知縣楊伯龍之繼妻張氏以順爲正無成有終柔嘉克踵乎前徽珩璜流譽慶澤用昭其嗣美翟禕增光茲以覃恩封爾爲孺人於戲如綸如綍勿忘象服之榮宜室宜家允副鸞書之錫  
貤贈陳加儒之祖父母

制曰考績報循良之最用獎臣勞推恩溯積累之遺載揚祖澤爾陳元貞乃浙江處州府宣平縣知縣陳加儒之祖錫光有慶樹德務滋嗣清白之芳聲澤留再世衍弓裘之令緒祜篤一堂茲以覃恩貤贈爾爲文林郎浙江

處州府宣平縣知縣錫之勅命於戲聿修念祖膺茂典而益勵新猷有穀貽孫發幽光而不彰潛德

制曰冊府酬庸聿著人臣之懋績德門輯慶式昭大母之芳徽爾浙江處州府宣平縣知縣陳加儒之祖母馮氏箴誠揚芬珩璜表德職勤內助宜家久著其賢聲澤裕後昆錫類式承于嘉命茲以覃恩賙贈爾爲孺人於戲播徽音於彤管壺範彌光膺異數於紫泥天庥永劭

封贈陳加儒之父母

制詞與楊曦垣同銜名見前封贈

隣水縣志

卷之五 誥勅

廿一

封贈杜需材之父母 乾隆元年

制曰資父事君臣子篤匪躬之誼作忠以孝國家宏錫類之恩爾杜之茂迺山東東昌府高唐州州判杜需材之父善積于身祥開厥後教子著義方之訓傳家裕堂構之遺茲以覃恩贈爾爲徵仕郎山東東昌府高唐州州判錫之勅命於戲殊榮必逮於所親寵命用光夫有子承茲優渥永庇忠勤

制曰奉職在公喜教勞之有自推恩將母宜錫典之攸隆爾山東東昌府高唐州州判杜需材之母夏氏壺範宜

家夙協承筐之燬母儀詒穀載昭畫荻之芳茲以覃恩  
贈爾爲太孺人於戲彰淑德於不瑕式榮象服膺寵命  
之有赫永賁泉壚

勅授杜需材本身妻室

制曰錫類推恩朝廷之大典奉公盡職臣子之常經爾山  
東東昌府高唐州州判杜需材賦質純良持身恪謹佇  
服官之奏績先報國以抒誠忱愜克昭新綸宜賁茲以  
覃恩授爾爲徵仕郎錫之勅命於戲宏敷章服之榮用  
勵靖共之誼欽茲寵命懋乃嘉猷

隣水縣志

卷之五 誥勅

廿二

制曰恪恭報國良臣旣殫厥心貞順宜家淑女爰從其貴  
爾山東東昌府高唐州州判杜需材之妻劉氏含章協  
德令儀夙著於閨闈黽勉同心內治相成於夙夜茲以  
覃恩贈爾爲孺人於戲龍章載煥用褒敬戒之勤翟芾  
欽承永作原泉之賁

制曰臣子敦服勤之誼典旣疏榮士女嗣淑慎之徽恩宜  
并茂爾山東東昌府高唐州州判杜需材繼妻甘氏素  
嫻內則動協女箴相夫載著勤勞宜家克彰令譽茲以  
覃恩封爾爲孺人於戲蘋蘩繼燬式揚彤管之徽綸綍



同褒勉贊素絲之德

貽贈楊崇之父母 乾隆十六年

制曰任使需才稱職志在官之美馳驅奏效報功膺錫類之仁爾楊宗美乃四川夔州府奉節縣教諭楊崇之父雅尚素風長迎善氣弓冶克勤於庭訓箕裘丕裕乎家聲茲以覃恩貽贈爾爲修職郎四川夔州府奉節縣教諭錫之勅命於戲肇顯揚之盛事國典非私酬燕翼之深情臣心彌勵

制曰奉職無愆懋著勤勞之績致身有自宜酬鞠育之恩

### 隣水縣志

卷之五 誥勅

廿三

爾四川夔州府奉節縣教諭楊崇之母孟氏淑範宜家令儀昌後早相夫而教子俾移孝以作忠茲以覃恩贈爾爲孺人於戲賁象服之端嚴誕膺鉅典錫龍章之渙汗永播徽音

貽贈張德化之曾祖父母 乾隆四十二年

制曰嘉謨垂奕葉允昭世德之求殊寵錫公朝益展曾孫之孝祇承新渥用報曩徽爾張仕美乃直隸翼州武邑縣知縣張德化之曾祖父敦修無斲垂教有方種德開先堂構益恢於來緒詒謀裕後箕裘克紹於前休懿矩

攸彰恩施遂逮茲以覃恩賜贈爾爲文林郎直隸冀州武邑縣知縣錫之勅命於戲四世其昌久聚德星之慶九原可作永承褒命之榮國典洵膺家風益振

制曰綏猷佐治寵旣被於外僚貞順垂休恩聿推於內德特敷惠澤用播徽音爾陳氏乃直隸冀州武邑縣知縣張德化之曾祖母肅雍竒範令善堪謨樹慈訓於後昆爰著鍾祥之德傳素風於奕葉式彰貽穀之謀允作母儀庸昭國典茲以覃恩賜贈爾爲孺人於戲九重錫慶洵邀丹詔之褒四世承恩益煥朱幘之色勤宣令問用

## 隣水縣志

卷之五 誥勅

廿四

闡幽光

賜贈張德化之祖父母

制詞與陳元貞同

賜贈張德化之父母 乾隆四十二年

制詞與楊曦垣同銜名見前封贈

賜贈馮學颺之祖父母 乾隆四十五年

制詞與陳元貞同銜名見前封贈

賜贈馮學颺之父母 乾隆四十五年

制詞與楊曦垣同銜名見前封贈

貽贈屈鳴介之祖父母 嘉慶十四年

制詞與陳元貞同銜名見前封贈

封贈屈鳴介之父母

制詞與楊曦垣同銜名見前封贈

貽贈廖寅之祖父母 嘉慶十四年

制曰表臣報績爰歸美于貽謀司士詔功必溯源於繩武  
殊榮洵被積代增華爾廖忠謨迺江西吉南贛寧兵備  
道廖寅之祖父衍緒開先垂庥裕後孫枝挺秀聿昭樹  
德之符世業丕昌大啟承家之學茲以覃恩貽贈爾爲

### 隣水縣志

卷之五 誥勅

廿五

中憲大夫江西吉南贛寧兵備道錫之勅命於戲錫五  
章而敷澤珂里流光推三葉以承恩德門襲慶祇膺茂  
典長荷寵綏

制曰鴻恩錫類聿彰貽穀之休令範宜家益著含飴之燬  
式逢慶典爰沛殊施爾馮氏迺江西吉南贛寧兵備道  
廖□之祖母慶叶珩璜訓嫺圖史心莊體順著壺範于  
中閨善積慶餘表母儀於奕世茲以覃恩貽贈爾爲恭  
人於戲播蘭陔之芳澤寵被重闈揚芝檢之徽音光流  
華胄榮章洵逮德範猶存

貽贈廖寅之本生祖父母

制詞與廖忠謨及馮氏同惟爾廖忠誥迺現任江西吉南  
贛寧道之本生祖父杜氏本生祖母乃茲以爾孫克襄  
王事不同

封贈廖寅之父母 嘉慶十四年

制曰夙夜宣勞事君資於事父雲霄布澤教孝實以教忠  
特賁絲綸用光閎閱爾廖貞泰迺江西吉南贛寧兵備  
道廖寅之父操修淳篤矩範嚴明術在詩書克啟趨庭  
之訓業恢堂構實開作室之模茲以覃恩贈爾爲中憲

隣水縣志

卷之五 誥勅

廿六

大夫江西吉南贛寧兵備道錫之誥命於戲錫天府之  
徽章殊榮下逮際人倫之盛美茂典欽承祇服誥詞允  
光譽問

制曰家聲昌大夙彰式穀之休壺教賢明不替樹護之慕  
適逢上慶用錫殊榮爾劉氏迺江西吉南贛寧兵備道  
廖寅之母敦習禮規恪循箴訓寢門治業著恒德於貞  
心閨塾授經寓慈風於雅範茲以覃恩贈爾爲太恭人  
於戲恩能育子挺杞梓之良材善必稱親被笄珈之茂  
寵祇承嘉獎永播徽音

封贈甘家斌之父母

嘉慶十四年正月初一日

制曰誼篤靖共入官必資於敬功歸訓迪能仕而教之忠  
爰沛國恩用揚庭訓爾甘道徹迺前任刑部員外郎加  
一級今陞陝西道監察御史甘家斌之父躬修士行代  
啟儒風抱璞自珍克毓珪璋之秀析薪能荷彌彰杞梓  
之良茲以覃恩贈爾爲奉政大夫刑部員外郎加一級  
錫之誥命於戲貽令問于經籙義方久著佩徽章於策  
府禮秩加優茂典丕承湛恩允荷

制曰移孝作忠懋簡勞臣之績推恩錫類式揚賢母之名

## 隣水縣志

卷之五 誥勅

二十七

載賁榮綸用宣懿範爾廖氏乃前任刑部員外郎加一  
級今陞陝西道監察御史甘家斌之母早嫻內則夙著  
規型敬以從夫宜室聿徵其順德勤於訓子備官一本  
於慈祥茲以覃恩贈爾爲宜人於戲荷彩翟之天章徽  
音益暢披彤毫之仙藻惠問常流祇服寵光式綏福曜

貽封甘家斌之胞兄

嘉慶四年四月初八日

制曰委質策名榮旣膺夫簪紱克家纘緒光必逮乎門閭  
爾甘家泰迺原任刑部陝西司主事加一級甘家斌之  
胞兄道足持躬情殷訓弟經傳詩禮青緇揚雁序之輝

慶篤芝蘭丹綉煥龍章之麗芳徽允懋新典宜頒茲以  
覃恩賚封爾爲奉直大夫刑部陝西司主事加一級錫  
之誥命於戲被章服以增榮聿顯友恭之義承絲綸而  
無忝彌彰善慶之風

誥授甘家斌本身妻室

嘉慶四年九月二十日

制曰弼教祥刑首重簡孚之任察辭蔽獄聿推明允之司  
爾原任刑部陝西司主事加一級甘家斌職司邦禁隸  
在秋官用法寬平克贊好生之德宅心矜恕式宏止辟  
之休茲以覃恩授爾爲奉直大夫錫之誥命於戲賁恩

## 隣水縣志

卷之五 誥勅

二十八

綸之有赫期執法以無愆寵命其承恪勤無替

制曰勤宣聲績聿徵服采之才茂著規型式獎同心之燬  
爾原任刑部陝西司主事加一級甘家斌之妻錢氏夙  
諳內則作配名門訓典嫻明允協珩璜之度禮儀純備  
克彰蘋藻之風茲以覃恩贈爾爲宜人於戲荷天寵以  
流芳魚軒煥采被國恩而錫譽馬鬣增高

制曰國恩寵錫式酬服采之勞閨範嗣修載獎觀型之化  
爾原任刑部陝西司主事加一級甘家斌之繼妻馬氏  
早諳女誡克舉婦功惠問交流潔先後而媲美素風相

昂充內外以同心茲以覃恩封爾爲宜人於戲扇蘭佩之芳蕤被芝泥之馨澤祇承慶典益劭榮名

誥授甘家斌本身妻室 嘉慶十四年正月初一日

制曰佐理法曹務體好生之德分司比部期襄弼教之風爾前任刑部員外郎加一級今陞陝西道監察御史甘家斌惠和秉性格慎居官輕重均調凜一成不變之志慈嚴互濟循三宥後刑之規茲以覃恩授爾爲奉政大夫錫之誥命於戲式虞廷之欽恤庸渙寵於絲綸師漢室之寬平允揚休於車服

## 麟水縣志

卷之五 誥勅

二十九

制曰臣心恪慎著懋績於周行婦職修明樹令儀於中閭爰頒慶典俾荷榮褒爾前任刑部員外郎加一級今陞陝西道監察御史甘家斌之妻錢氏茂族含芳名門伉儷素風自矢克敦圖史之型泊節相規無改縞綦之度茲以覃恩贈爾爲宜人於戲表從夫之大義翟萐承恩沛逮下之深仁魚軒被寵祇承休命用播幽貞

制曰匡襄賴乎嘉猷特褒臣節疏榮及乎繼室咸沐恩光爾前任刑部員外郎加一級今陞陝西道監察御史甘家斌之繼妻馬氏幼嫻內則少習壺儀慶十鳳凰叶和

鳴於初吉聲調琴瑟傳靜好於同心茲以覃恩封爾爲  
宜人於戲應地含貞允紹前徽而罔間從天沛澤尚揚  
淑問於無窮

貶贈屈澤霖之祖父母 嘉慶十四年

制詞與陳元貞同銜名見前封贈

封贈屈澤霖之父母 嘉慶十四年

制詞與楊曦垣同銜名見前封贈

貶贈劉義遵之父母 乾隆五十五年

制詞與楊宗美同銜名見前封贈

### 隣水縣志

卷之五 誥勅

三十

貶贈馮成範之父母 道光元年

制詞與楊宗美同銜名見前封贈

貶贈馮學謨之父母 道光元年

制詞與楊宗美同銜名見前封贈

貶贈汪翮儀之父母

制詞與楊宗美同銜名見前封贈

貶贈唐昱之父母

制詞與楊宗美同銜名見前封贈



蔭襲

邑宋有楊端官至大學士明有甘學濶馮從龍甘良臣  
陳三台俱登顯位又陳桂棟守城殉難皆宜有所蔭襲  
乃舊志僅有甘一爵世襲意者久而失傳歟我  
朝亦止有一人特列爲一門以備稽考

明

甘一爵總兵良臣之子以軍功世襲指揮使靖共厥職  
稱克家焉

國朝

隣水縣志

卷之五 蔭襲

三十一

甘培陞陝西漢中府把總甘俸之姪俸勦清江賊陣亡  
以其姪廕襲雲騎尉

坊墓

士人登科筮仕流芳珂里與夫忠臣孝子烈女節婦皆建坊以表之所以樹風聲昭楷模也至於窀穸佳城雖未必皆季壟然鄉先生之遺兆未可任湮故附誌之

上諭坊 在縣治大堂前雍正元年建

古隣州坊 在縣治儀門外□樓前康熙五十九年邱鏞立

科甲

明

進士坊 二一為進士楊純立今城上坊柱尚存在城東街

隣水縣志

卷之五坊墓

三十二

解元聯第天官大夫坊 為進士劉三才立在城上街

世代天寵坊 為進士馮從龍立在北門外

甲第傳芳坊 為進士孔宏頤立在城上街

天子耳目南國文宗坊 為進士甘學濶立在城東北街

天幾豸史七藩總憲坊 為進士楊一儁立在縣治前

名賢坊 為楊芳春立在城內前街

節制兩省分閱三邊坊 為陳治道立在城西街

科第聯芳青雲繼美坊 為劉嘉會劉嘉賓立在城上街

天朝名帥昭代元戎坊 為甘良臣立在城北街

國朝

開晉循良坊 為舉人楊伯龍立

金錫圭璧坊 為舉人楊崇立

書香甲第坊 為任廣東南雄府通判立

貞節

明

冰霜自守坊 為吳潛妻談氏立在城東街

栢舟勁操坊 為侯世延妻吳氏立在東門外學街

一門雙節坊 為周在邠妻陳氏兒媳彭氏立在城中街

### 隣水縣志

卷之五坊墓

三十三

國朝

節孝雙美坊 為楊伯元妻汪氏立在縣署前街

皇恩褒節坊 為甘明宣妻李氏立在南路五十里

孝義兼全坊 為鍾士槐妻梅氏立在城南街

烈女坊 為邱清姑立在治東十五里三重堂

坤維正氣梓里芳型坊 為熊宗筠妻梁氏立在治南八

孝義兼全阨窮堪憫坊 為熊本溶妻陳氏立在治南九

松栢同操坊 為陳士尊妻唐氏立在治西三十里碗坪

節烈可嘉坊 為梅成松妻吳氏立在治西下觀音橋

旌表節烈坊 爲王宗虞妻游氏立在治北王家場

耆碩

國朝

昇平人瑞坊 爲呂玖百歲立在治西六十里合流水

陵墓

明

贈陝西巡撫甘公一桂墓 在城南六十里老君山下

贈吏部尚書劉公三才墓 在城西半里立有石馬翁仲

隣水縣志

卷之五坊墓

三十四

陝西左布政使司馮公從龍墓 在城南半里

陝西按察使司副使楊公純墓 在城西二十里擔水灘

浙江按察使司副使楊公一鈞墓 在城北一里

鄉賢楊公芳春墓 在城西十里御史溪

東閣太師劉公文林墓 在城南七十里踏泥橋

進士杜公景賢墓 在城南一百二十里□填菴

知縣彭公齡墓 在城東七十里石船里

國朝

都轉廖公寅墓 在城南八里白菓園

隣水縣志卷之五

藝文志

疏奏

明末兵燹後故家遺老無存經前人於斷碣殘碑及見於他書或書奏或記序或題咏凡有關於邑之風土政之得失者悉紀錄之以備採擇蓋創始者實難也今人文蔚起而有關風土政事之作不稍概見或者未嘗搜輯與茲特援通志已載及他志應載之例以存其人之著作先疏奏次記序書狀約條傳誄銘論又次之賦與

隣水縣志

卷之五 藝文

三十五

詩詞歌第寫景物以是終焉

請開言路以益治道道疏

明御史楊

純 邑人

臣純言臣聞天下不以言治也然治天下必求言誠以言者天下之心聲也人心有甘苦則呼其所親心有所不平則俯仰而嘯且鳴是故爲民父母願其達不願某鬱也日月風雨天造亦旣宏多然雷霆不作則萬物之氣不動君人者綱紀政刑治術亦畧備矣而聖人必鯁鯁焉日夜迫之使言夫亦將作其氣而樂天下無隱也昔者子違汝弼汝無面從舜嘗咨禹矣木從繩則正

后從諫則聖傳說勸高宗矣防民之口甚於防川召公戒厲王矣大舜高宗厲王使言不言相反而治亂亦遂懸絕則拒天下之口舌而卷之者不亦悖乎臣故願陛下毋以言爲諱也然進言之指不啻萬而大要不過有三有可見諸行事之言有交相參酌之言有繁瑣無補之言可實見諸行事者審氣數察時勢別遲速辨成敗或致必爭之利或祛積安之弊或決不斷之疑從之者君德興百務昌國用平康此言之不可不聽者也可交相參酌者陳古說輯民風揣衆職之是非議朝政之可

## 隣水縣志

卷之五藝文

三十六

否今雖不行後將有待議雖越俎理實相成此亦言之不可不聽者也繁瑣無補者負倔强之氣喜直戇之名不達時變不諳物情所見無端而痛哭反身不量而互爭如此者言雖不足聽亦當寬容之以廣陳言之路者也陸贄曰諫者多樂我之能好諫者直表我之能賢諫者之狂誣表我之能恕諫者之漏泄彰我之能從有一於此皆爲盛德美哉洋洋乎贄之言豈非萬世聽言之龜鑑乎晉平公問於叔向曰國家之患孰爲大對曰大臣持祿而不極諫小臣畏罪而不敢言下情不得上通

此患之大者嗚呼患而謂之大豈非言路不通必至於危亡哉近日者皇上雖未嘗以言爲諱而在朝之臣兩月絕無章奏豈果朝無闕政與臣滋懼矣惟皇上熟思之或不以臣言爲謬也謹疏

## 隣水縣志

卷之五藝文

三十七

密陳平賊機宜疏

明陝西甘肅  
巡撫 學濶 邑人

臣學濶言賊發難以來十年矣以盧象昇之忠孫傅庭洪承疇之練曹文詔曹變蛟左良玉之勇而或以輿尸或以齎敵迄無成功者緣任事諸臣多不以實上聞而朝廷之上沿承平餘習惟解端拜詳視厭言兵革戰守機宜全不加意卽如近日吳甡受命撫晉辭謁閣臣請受方畧而首輔溫體仁僅曰流寇癘疥之疾不足多慮夫輔臣獨不聞賊已踰底柱涉孟津而猶可度外置之乎臣竊憂焉用敢冒萬死蹈不測之罪爲我皇上陳之

從前賊之長計在奔得志在掠今也關箱聚落之殆盡  
剽掠無所得食賊之勢亦窮矣且賊秦人也自其渡三  
晉過河南奔走萬里而必以秦爲歸今秦師大克不敢  
復叩關而入彼轉關數載功業無成鄉里道斷能無倦  
而思悔乎其初刼於饑寒而懼於誅戮今見朝廷果有  
意招之且內料同類猜嫌勢必自相斬殺何不早乘此  
時臣事天子而顧甘心爲賊耶劉國能李萬慶現在去  
逆效順轉爲我用非其彰明較著乎語曰天道十年一  
變今日之賊實有可平之勢此時官軍宜以急攻爲上

## 隣水縣志

卷之五 藝文

三十八

緩則難圖第所謂急之之道不可不審今逆賊方悉力  
於三晉請勅孫傅庭嚴守關中絕其歸路祖寬駐河上  
阻其南奔周遇吉出澤州林報國出太原左良玉出彰  
懷黃得功出井陘洪承疇以大兵擣其中堅李萬慶等  
間諜誘夥賊降附使逆賊疲於奔命庶幾功可成而賊  
可平惟陛下鑒察焉



保守城垣軍功著有勞績疏

國史 御史 甘家斌邑人

竊臣籍四川隣水縣嘉慶二年間川省大股邪匪王三槐徐添德冷天祿等勢正猖獗於十一月初七日率衆至縣環攻城垣經署令楊爲龍及典史陳鑑教諭唐學聰等招集鄉勇有紳士黃士古周興望何春艾長斌甘于疇胡世錫等鄉民張正心胡文茂張輝字等帶領鄉勇捐輸口糧登城捍禦因城外後山高出於城此山之麓卽係城脚甚爲逼近邪匪憑據高處施放鎗炮打入城內又於四面架設木梯捨命直上并乘黑夜挖掘城

## 隣水縣志

卷之五 藝文

三十九

根呼聲環震絡繹不絕該紳士等設法堵禦互有殺傷因寒冬凜冽日夜凍餒漸至難支賊匪復於後山造高大木籐排列如牆下用圓軸以便推挽內設橫板爲梯可以拾級而上一面拆運房料從外堆積欲自山麓填滿城濠將籐推至城垣高及於堞因而一齊擁入使難抵擋鄉勇擊以礮石被籐障蔽賊轉放施鉛彈從高擊下飛集如雨將司炮鄉勇鄭朝黃初元中傷身死計先後陣亡者三十餘名受傷者不計其數鄉勇無計可施見其堆積業將及城人人驚恐俱無生氣城內老弱士

女皆欲懸樑自盡卽署令楊爲龍亦欲捐軀效死當此之時城之陷否祇爭一間適有鄉勇包順之甘景清等趕往救援路經距城里許之延福寺見有邪匪在內出其不意直入掩殺并將王三槐之妻及其弟王三元殺斃邪匪撤回人衆將該鄉勇圍住死傷大半城內鄉勇因得乘閒趕用火藥并帶漬汕火具縋出城外焚其木簾並燬堆積木料賊始失其憑恃於十五日解圍而去此縣城被圍七晝夜之久卒得保全之大概情形也當經該署令查明出力軍功彙冊申詳并分給印信執照

## 隣水縣志

卷之五 藝文

四十

在案王三槐去後一路焚掠至二十三日將長壽縣攻破仍回隣水深憾此項軍功往來搜殺死亡甚衆而署令楊爲龍旋回本任與教諭唐學聰先後物故典史陳鑑亦卽丁憂回籍平定以後此項軍功不知作何辦理茲有軍功張正心由陞任縣令陳崇禮申詳註冊攜照來京查無前案於本年四月間呈懇步軍統領衙門咨交吏部行文川省至今未見咨覆臣查前案已歷多年且十一年議查軍功摺內有無論從前奏明與否此時查驗執照確實卽照其品級之大小以爲錄用之等差

等語此案軍功既經縣令屢次冊報何以部中尚無案據自係當日統兵大員軍務匆忙以致遺漏迨後或因守護城池與欽奉

諭旨隨征堵禦之人情節參差是以未克推廣

皇仁惟是縣城被圍七晝夜之久該署令等既督率有方悉心保障而該軍功等亦不惜死力上爲

國家邊陲保護城垣下爲無限被難人民保全生命實與隨行堵禦者同係出力之人且困守孤城衆寡不敵懸性命於呼吸挫賊勢於方張較之隨征堵禦者尤爲可

### 隣水縣志

卷之五 藝文

四十一

憫似未便沒其勞績獨令向隅除張正心已經吏部行文查辦外其餘守城實在出力軍功均係得有執照未能同邀錄用可否遵照前

旨原議一體驗明執照分別辦理之處出自

聖主逾格鴻慈至臣在京服官多年當日鄉勇出力情形係於嘉慶四年回籍僅記大概合并聲明

禁止婦女入寺以維風化疏工部給事中甘家斌邑人

竊查婦女入寺燒香及僧道軍民人等於各寺觀菴廟  
刁姦婦女誑騙財物例有明條誠以廟寺回廊複院種  
樹蒔花點綴娛人蓄奸孔易故必防微而杜漸也乃近  
來寺廟因春夏之交花蘂開放招搖婦女前往遊觀并  
於浴佛之辰設爲勝會雖經地方官定爲男子先期婦  
女後期而或差役未往或一氣串通於婦女期內遇有  
遊蕩子弟給以錢財仍准攬入核其心跡殊多曖昧顯  
因深房秘院藉此乘空刁誘致有秉蘭贈芍邂逅說懾

### 隣水縣志

卷之五 藝文

四十二

情弊似此傳聞情節甚屬褻瀆神明有關風化現屆宣  
武門外法源寺開設放生勝會之期卽須加意查禁以  
挽積習而息物議相應恭摺請

旨勅下步軍統領衙門順天府五城出示曉諭并將窩留刁  
誘之僧道認真偵訪嚴辦示懲再查寺院房宇旣多招  
留匪類坐地分贓狎邪匿垢亦復不少以及各省僧人  
廣置土田逸則生淫託名懺悔誘衆禮佛男女混雜姦  
僞叢生其所招佃戶亦每係不端莊婦女宣淫無忌俱  
宜一律查禁分別懲治并令自食其力不許招佃免滋

弊端爲此奏聞伏祈

皇上睿鑒

嘉慶十七年四月初七日奉

上諭工科給事中甘家斌奏請禁止婦女入廟以維風化一摺寺院菴觀不准婦女進內燒香本有例禁京城廟宇叢多或曰久奉行不力著步軍統領順天五城出示曉諭如有開設會場招搖婦女入寺者一體查禁至所奏廟宇收畱匪徒一節各寺院閒曠房屋招租取利在所不禁但亦須分別良莠若知情容畱奸宄一經發覺卽

隣水縣志

卷之五藝文

四十三

將該僧道從重治罪其所奏外省僧人置田招租之處亦著地方□□□稽查毋令滋弊

嚴定西洋人傳教治罪專條疏 甘家斌

竊維師巫邪術左道異端因以邪害正易於滋事俱分別首從嚴治其罪並將地方官交部議處原使有所儆畏不敢輕犯故此等教匪尚少蔓延惟天主教自康熙年間流入內地曾延及廣東陝西四川湖廣山東山西直隸等省以及京師皆被煽惑歷經查辦毫無底止推原其故總因該教性狡黠巧於避就又因辦案時人每過多難加深究故同係邪教惑人而治罪獨輕且地方並無處分不免因循就令查辦亦不過遵照成案難以

### 隣水縣志

卷之五 藝文

四十四

示懲以致肆無忌憚任意蔓延殊爲風俗人心之害並恐積而愈衆滋生事端查該教不敬天地不祀祖先不孝父母不畏刑罰種種欺公藐法背名畔義實屬以邪害正情理難容既經造書煽惑動次數千戶人民泯蔑綱常背違法紀卽係妖言惑衆其設立十字架誘衆禮拜亦與隱匿圖像燒香集衆者情節相同未便治罪獨輕致無顧忌且聞該教以符咒蠱惑姦污婦女誑取病人目睛律貴誅心該教既非圖財又非勸善果何所爲必隻身在外傳教迷人行惡亦未便任其狡展不實不

盡至內地民人食德服疇胆敢信從邪教目無尊親不  
惟轉相傳授罪無可逭卽自習學亦有應得之罪雖犯  
案後法難及衆然必嚴定條例以杜其漸乃爲辟以止  
辟之道相應恭摺請

旨勅下部臣查照煽惑及衆各例詳定科條以符情罪並酌  
定失察識名務使人知儆畏稽察認真庶刑期無刑可  
以長臻寧謐議定以後行文各省出示曉諭以一年爲  
限自首免罪地方官並免議處若遇限不首未經查拏  
均照新例辦理等因奏

## 隣水縣志

卷之五 藝文

四十五

聞

上諭

西洋人素奉天主其本國之人自行傳習原可置之不  
問至若誑惑內地人民甚至私立神甫等項名目蔓延  
各省實屬大干法紀而內地人民安心被其誘惑遞相  
傳授迷罔不解豈不荒悖試思其教不敬神明不奉祖  
先顯畔正道內地人民聽其詭立名號此與悖逆何異  
若不嚴定科條大加懲創何以杜邪術而正人心嗣後  
西洋人有私自刊刻經卷倡立講會蠱惑多人及旗民

人等向西洋人轉爲傳習并私立名號煽惑其衆確有  
實據爲首者定當絞決其傳習蠱惑而人數不多亦無  
名號者著絞候其僅止聽從入教不知悛改者著發往  
黑龍江給索倫達呼爾爲奴旗人削去旗檔餘著照該  
部議行

隣水縣志

卷之五藝文

四十六



初建新城記

嘉靖四十二年

明進士

陳萬歧

邑人

高皇帝平定海隅撫有華夏郡縣如星羅碁布雖天氣地物純駁參錯治有難易而設官分治必相乎其時與得乎其人而後次第布置可臻上理鄰水爲昔鎮地成化初改縣治緣非衝途故鮮歷兵華百年來雖冠裳禮樂蔚然與諸路並稱而城郭尚缺蒞斯士者亦多視爲緩圖嘉靖癸亥係世宗四十二年羣盜突起倉猝且至人人以設守無據爲憂邑侯吳公乾亨神色不變諭集士勇歷堵要害賊不敢犯旋就盪滅賊旣平因遂以城事爲先

## 隣水縣志

卷之五藝文

四十七

尾弓

二字疑有悞

經營命匠鑿石甃砌城垣高二尋周廣五

里未易寒暑而雉堞戍樓巍然稱雄鎮焉夫隣僻處山陬初未嘗有縣也開於汪公縣故無城也始於公山川良遇非所謂其時與其人若有待者耶昔者夏治安邑殷人治亳周人治洛史悉識之孔子削魯文自城社山川宮廟門觀臺榭廐圃軍戍稅甲無不燦然備列蓋其謀猷雖在千百年之前所慮常在千百年之後故也今之從政者讀書類能出大言其臨政則因循苟且辭勞就逸而於經久不敝之業退乎若讓焉如公者豈不卓

然真人傑也哉自是疆宇靜闕春誦夏絃士因以竭其才農得以食其力而一邑之無廢時無廢事者頂背相望而起詰戎詳刑捕匪宣教分庶職者各得以安行其志然則斯城之建所以整飭綱紀維持教化者皆於此係之匪獨保障潞人防禦寇盜已也是役也公捐俸先之而民之有力者亦莫不懽忻鼓舞如子來趨事是以城成而民不病云

按嘉靖四十二年冬俺答子辛愛把都兒入寇京師戒嚴於時盜賊滋熾亦可概見記中所云羣盜突起

## 潞水縣志

卷之五藝文

四十八

倉卒且至自係逼近邑境是以人人爲憂雖其詳不可得聞而自是創建城垣則李侯之功洵有不可沒者記所言皆實蹟也至汪公開縣或係成化時人但官職無姓汪者其事無考

建鄰水縣記

本朝教諭 宋文英

粵考鄰邑自明成化丙戌改鎮爲縣相傳二百餘年至  
崇禎癸未流寇猖狂城郭廟舍化爲灰燼繼而饑饉洊  
臻虎豹肆虐以至十里無人百里無烟而原野坵墟甚  
矣此方之困也我

朝順治十七年始簡李侯臨蒞茲土侯輕騎就道不閱月  
直抵邑境問其城郭廟舍已茫然不可復識矣城東數  
十里許有宗性寨因僦居焉下車卽軫念凋殘詢疾苦  
清戶口定賦役察奸安良凡一切利弊無不殫力興革

隣水縣志

卷之五 藝文

四十九

首捐貲創立文廟於山巔朔望拜謁躬親教化課經書  
民無秀愚皆知向學今之梓潼宮卽其地也越明年康  
熙壬寅九月奉開城之令計合邑子衿不滿二十殘黎  
不過三百一旦建興大工談何容易且令下之日又奉  
有遷移會勦兩大役一時並舉惟侯亦頻顛曰天不欲  
吾成開城之功耶然不敢憚勞也黽勉鳩工修葺城垣  
始建中堂儀門臺樓繼建賓館庫樓門樓不數月竣事  
乃移居卽建學并大成殿舉向之鞠爲茂草者一旦而  
更新之復建社學於劉解元舊基念其發跡之地不憚

沒於編戶也侯昕夕勸學訓誨忘倦而今而後凡有奮  
翮天衢者誰不沐侯之化誦侯之功若蜀人士之景仰  
文翁乎復建城隍關帝文昌三廟功俱成邑人請卽勒  
石以記侯弗許曰記事以心不以言何借一石爲也因  
相遲者久之侯性安儉靜不好粉飾易事難說有古大  
臣風采公餘喜談文癸卯入簾所得皆佳士今正當報  
績之期流民漸集盜息民安訟獄不興士升於秀農力  
於耕城野煥然其改觀焉因序其開建招撫之績併記  
其年月次第以誌不忘云爾

## 隣水縣志

卷之五藝文

五十

重修儒學碑記

嘉靖元年

明翰林

任

瀚南充人

皇帝卽位之元年太史奏昌光見井絡東分入參七度  
後當有元士應其下九年清平侯馮燦至鄰水釋菜孔  
子廟廷嘆曰學敝矣而士子絃誦不輟昌光之入參分  
意在斯乎乃下令爾民有能贊學宮役者書若名著諸  
石其有入下刑請得以是役贖者聽詰朝梓人眠曲直  
柞人場人薙籩材圻人陶人磬人眠良窳苦人易庇續  
人易丹矍元聖越明年成因念周道衰聖王不作而豐  
林長谷山陬水涯隱哲藏賢不勝指屈攷其淵源皆出

於學孔子立人極道光前古顧其廟蕪穢不治有司視之若視敝園不爲感誠爲缺政馮侯抱異才爲令不務追逐時好媚當路人取顯官獸先務學豈不翛然高世俗之良有司哉爾鄰士逢衣果冠栩栩集學舍誦法孔子異時必有以吾道鳴天下上應昌光之瑞固馮侯所厚望也若乃竒袞變古持曲學亂政誤人流旤國家爲害後世其何以對馮侯乎學故無泮其外截業甃石爲門三南面戟門高眡外門廣狹稱深三倍南面六楹迤東循迴廊上簷楹相匝爲東廡西面門迤西循迴廊上

## 隣水縣志

卷之五 藝文

五十一

簷楹相匝爲西廡東面各六楹左右廡環以柏淒清簫瑟如秋中爲赤墀孔廟在赤墀上高倍戟門廣深稱六楹南面東廡迤北高眡西側室廣深稱爲正誼齋西面西廡迤北高眡東側室廣深稱爲明道齋東面各四楹其上爲明倫堂四楹又其上爲御製碑五爲亭三南面亦四楹其餘廩庖廨舍禮樂器當朱侯于侯蔡侯作者諸不載

重修儒學記

嘉靖五年丙戌

明巡按

江萬實

大竹人

潞有學舊矣自成化迄今六十餘禩於時縣治創始百役并興材艱力斲兼之董治匪人亟於就緒苟且文具取辦目前一切趨於簡便殿廡堂齋庠濕蹇狹形雖具而實不充凡門號廬庫等類載在禮制者悉所未備無以安聖靈振士氣以故科目厪厪才可縷指歷十數令而莫之釐正閱歲滋久材敝益朽基地益傾瓦落垣頽屬目增慨嘉靖紀元之五載古黃蔡侯珀來尹茲邑滌篆詣學周視嘆曰潞巖邑也風教莫先焉異端吾儒所

## 潞水縣志

卷之五藝文

五十二

弗齒猶有崇飾其宮者學校有司首務顧當如是耶實吾責也延洎學諭樊君相典訓導何君洪高商其事樊以狀請於當路得白金近六鎰分守朱公又資以五十餘金委判簿葵邱王君臣暨保安陳君嘉猷蒞其役遂鳩工庀徒先起大成殿爲三重五間次則堂間數如之又次兩廡爲間者二十有四櫺星門砌石爲基臺門之制始備先是基址傾仄因傭壯健施畚鍤再更寒暑鑿平山石數十丈復拓傍近地若干畝規制始宏厥適值歲歉流殍載途或謂役可紓侯弗聽曰吾獨不若范希

文之活我饑民且就此成緒也耶浮言胥動此志不移第約費尚不及十一爰捐俸資獎殷富發公廩并體漢法之耐金效周官之束矢經始於嘉靖丙戌春初訖功於己丑春暮逾三稔乃告厥成潏之士民僉謂此功之艱倍於創始爰走書於余請紀其事予謂天下事未有不由學而成者四代之學尚已禮樂詩書之教傳記可考已循是而降漢以訓詁唐以詞章宋之理學大明而猶病於記誦嶮巇之習獵聲華謀利祿往往而是夫學而不以聖人之道猶弗學也苟非羣聚甄別而陶範之

## 潏水縣志

卷之五藝文

五十三

得所則亦無以聯師儒修典法稽功緒正習尚而臻厥大成傳曰百工居肆以成其事又曰君子學以致其道蓋惟聖人之道必全體大用以爲道君子之學必明體達用以爲學大學自明德以至新民中庸由三德達於九經皆是物也今廟學新矣景嚮貞矣藏修息游又有所矣因是而有體具用周之才出則所以爲天地立極爲萬世開太平者於是乎在舉聖道體用之大全而一以貫之矣是蔡侯暨二三君子振勵作人之功不特著於此邑此時而且旁行四達流於世世其嘉惠後學不

其偉與候行傑才良政多可紀此特其一節耳竹鄰鄰也初一邑也余亦邑人也雖說道學而未能因輿情見屬而有事於貞珉故敢以是考焉

## 隣水縣志

卷之五藝文

五十四

復建儒學明倫堂記

國朝邑令 李時亨

觀學於鄰陽而嘆山川縈結糾纏羣聚於此宜人文之輩出也惜也兵火之餘門牆草莽堂基廢壞有心者見而憫之曰堂不復建則倫將不明將如堂何於時司理王公始其意而屬余終其事予乃於廟之東偏程材庀工峙廩糗具畚築蓋取辦於心力之能至未敢煩一物於多士也功既成椽櫨桶榱心縮角結受以柱石大小畢安謀朝屬課旭氣滿楹卜夜考經斗光納牖鄉飲以升壽考慈孝之意充庭朔望而聽鼓鐘風雅之聲浹戶



擇地而蹈者既幸履高廣以知休悖經以馳者亦可觀  
壇圯而思返然則作斯堂也豈徒曰人文之聚已哉

隣水縣志

卷之五藝文

五十五

重修儒學記

知縣 蔣 擢  
大興人

予歷考盛世之治莫重於人材而所以育人材莫重於  
學校蓋學校重則人知禮義而譽髦俊彥之士羣相鼓  
舞於其閒而後出而有爲以成一代之治是以京師首  
善爰立成均典樂教胄憲老乞言其意至深且遠而黨  
庠術序之設厥制亦與并重故申之以父子君臣之義  
而復以詩書澤之以琴瑟干羽鼓動之終其身淪浹於  
禮義之中使天下曉然於善之可爲而一時賢才輩出  
風俗醇厚其道未或踰乎此也然則學校所關顧不重

哉我

皇上側席右文崇儒重道數臨幸大學頒發經書日講諫意  
上幾唐虞三代之隆而且先言臣條議令各省捐輸修  
葺學宮紀功優敘無非養育人材地也而督撫藩臬諸  
臣朝奉命夕檄下莫不爭相濯磨以副

聖天子同文盛心奈何吏治久窳視儒術爲迂疎卽賢有司  
類以催科簿書爲急春秋享祀朔望拜謁僅循故事求  
其修廢舉墜以養育人材爲重者蓋亦寡矣嗚呼學校  
不重則賢材何由以漸摩淪浹而曉然於善之可爲予

### 隣水縣志

卷之五藝文

五十六

不敏幼奉先人遺訓盱衡當世思有以振之康熙四年  
承乏鄰水雖僻處果郡東南舊稱劇邑科第蟬聯有明  
隆萬以來銓部劉公三才方伯馮公從龍大中丞甘公  
學濶侍御楊公一雋後先繼起勲名相望父老至今猶  
能傳之予下車後卽趨謁

聖廟在邑之東郊僅存大成殿蕪沒榛芥中前後堂廡鞠爲  
茂草遂不禁慨然奮興曰是有司之責也爰捐奉二百  
餘金購木石若干瓴甃若干灰鐵堊飾之屬若干屬諸  
生胡士奎鄉約耆老胡一學吳伯眉吳伯祥董其事於

是正殿之朽者易之缺者補之墨者聖之而啟聖祠明  
倫堂東西廡名宦文昌諸祠相繼建立始於甲子歲之  
孟春迄今年餘落成予率諸生展拜於廟牲器蠲潔俯  
仰進退咸肅於禮乃進諸生而謂之曰爾亦知學校之  
重乎學校修而後育才有地人才育而後風俗以醇從  
此講習彝倫澤詩書而教禮樂不寧紹劉馮甘楊諸公  
之緒而所以炳然蔚然上副當代右文之治者實基諸  
此矣諸生皆以余言爲然爰勒之貞珉以貽後之君子

## 隣水縣志

卷之五藝文

五十七

重修文廟碑記

舉人 陳加儒 邑人

鄰城縣治鄰州分土也自梁大同肇造州城在邑東鄰  
山里宕渠諸邑屬焉嗣是沿革不一前明成化間裁州  
分縣治遷銀鼎時邑侯朱公瑩建城垣卜學宮於郊外  
東關懷仁山之麓西則海寶連雲啓其秀北則香爐萬  
峰效其靈而東南一帶文筆叅天廻溪蕩漾洵文明佳  
址也於時經營揀度剏廟周垣

至聖之靈妥焉但工屬草創制尚缺如後六十年嘉靖時有  
蔡侯珀聿新厥制又神宗九年清平侯馮公燦復治之

典麗喬皇其詳載於江公萬實任公少海兩先生之記  
由是道脉淵深播爲人文一時先達輩如孔甘馮楊諸  
公甲第蟬聯蜀號望邑值明末流寇來潏一炬燼灰凡  
城邑佳麓半落荒烟蔓草中矣而廟制已隳逮奉

聖朝一新鼎宇己亥李侯時亨

簡命撫潏營城隍新廡舍外首重文治重修聖廟凡啟聖以  
及兩廡櫺星諸門釐然具舉而廟制一新閩中徐公枝  
芳新之逾二十年淮南邱夫子惺齋先生重新之迄於  
今又六十餘年矣棟宇成古階沒苔痕守斯土者代遷

## 潏水縣志

卷之五藝文

五十八

靡常未及理治時庚子歲二月江右魏侯攝邑篆下車  
謁廟而蹙然曰是則制之缺也爰捐俸以爲邑士倡甫  
鳩工鶯遷去逾月黔南邑侯江公以名進士來治斯邑  
仁廉明恕急於起廢趨躋入廟慨然曰是吾任也首捐  
金命縣佐胡公攝其事更檢邑庠生王繼曾馮開鎬周  
振芳周承秀鳩工庀材焉有廢聿舉圯者興之圻者補  
之大成殿殖殖其庭啟聖祠有覺其楹而諸賢兩廡及  
名宦鄉賢忠義節孝並明倫堂櫺星泮池門屏之屬城  
以文階周以磚垣無不備具煥然改觀也起於五月落

成於辛丑十月高廡宏麗與鄰山水爭竒勝允矣文明  
運開乎制此新宮偉麗旣成以享以祀神降其靈思樂  
泮水之風園橋觀聽之盛於是乎啟之是何也聖廟者  
都人士發祥之地建學者培養道脉之源諸生春秋薦  
享展拜於斯瞻俎豆之森列肅衣冠而拜獻奮然有志  
於宗廟之美百官之富振興寧有旣乎昔宋歐陽文忠  
公吉州學記曾南豐宜黃學記與夫紫陽先生鄂州稽  
古閣記闡發建學造士之旨犁然典誥也邑士循此而  
觀摩焉毋慕浮文而敦實行毋馳聲華而尚闡修一以

## 隣水縣志

卷之五 藝文

五十九

敦倫飭紀檢制言行爲先是亦聖人之徒也諸生勉乎  
哉是舉也新前人之制啟後人之規費金七百緡剏始  
者邑侯魏公江公襄事者縣佐胡公儒學嚴公集腋捐  
資者邑人士董治維新者邑庠生馮周諸士也勒名貞  
珉於以不朽是爲記

建義學碑記

訓導 周 衢

康熙四十三年閩浦徐公枝芳來宰鄰水甫下車問民疾苦革弊除奸先之以禮樂申之以王章不閱月悉就條理維時政事之班班可考者大而

聖宮城垣小而橋梁道路靡不釐然畢舉識者謂其本學術發爲經濟初非徒博升斗者可比也一日集都人士謂之曰鄰水山明水秀宜乎科第蟬聯胡侍御馮方伯甘中丞而後竟至絕響乎揆厥由來實由於不學之故而其所以不學者又實由於父兄不知教與不能教之

隣水縣志

卷之五藝文

六十

故夫不知教與不能教是則牧民者責也爰是鳩工庀材擇隙地以建義學顏其堂曰棲鳳俾不知教與不能教之子弟咸集於學延師訓迪之且置義田爲諸生饘粥資每月兩課必親其地與諸生童晰疑辨難反覆申明務使曉暢而後止謂非本學術以宏經濟者能如是乎將見家詩書而人禮樂人心風俗日進於淳龐而文風丕振於以嗣美楊馮諸君固可決其捷於影響矣是爲記

修建義學記

知縣 袁鍾秀 江西人

自昔文翁化蜀而後司馬諸公詞賦甲於天下及唐宋元明諸君子繼起或精忠貫日爲當代之名臣或經術湛深推一時之理學彬彬乎蜀地人文之盛史冊昭垂洵不誣也余於甲申歲奉

命來宰鄰邑甫入境見夫山水之秀麗人物之清竒意其中必有含英咀華之士繼往代而興起者乎蒞任後披覽邑乘多缺漏弗全所載科第人物惟明時稱爲最盛至我

### 隣水縣志

卷之五 藝文

六十一

朝定鼎以迄於今百餘年間登賢書者寥寥數人且自乙卯以後科名弗續豈氣化之偶有缺與抑亦官斯土者作興鼓舞之有未盡耶譬之大木不經灌溉弗獲連抱之才方之璞玉不藉雕琢難成廟堂之器是義學之設有關於文教也大矣但隣當凋殘後開懇入籍有數省之民新著雜處獄訟繁興居官者日鞅掌於簿書亦且兩袖清風力難兼顧爰有志焉未遑及也丙寅歲奉文清查空廟因獲充公之田數處遂不禁欣然曰義學之設其有藉於是乎因攷從前徐令爰建立義學講堂五

間在文昌宮右其地狹隘不足壯觀又碣石所載舊有義學田二處現據諸生呈請并歸義學經管爰卜地於城隍後官地基內其地寬敞遂鳩工庀材建後堂三間前廳三間右書齋五間大門一間周圍垣牆不數月而工告竣延師訓課其中將義學田租助師生膏火之資於以佐文明而儲國英實有厚望矣昔李渤建學白鹿人文蔚起東南椒山講學臨洮文治霞蒸西北肄業者得其地受教者達其材行見潏山金盤之秀啟我文明卧龍石壁之竒毓爲英俊必有絕類離倫脫穎而出者

## 潏水縣志

卷之五 藝文

六十二

以繼美前代諸君子吾知其捷於影響矣都人士其共勉之



重修延福寺碑記 正德四年

蘇 彰州廣安人

鄰水古邑也廢於元末我朝混一區宇地屬大竹縣成化丙戌居民應役道遠奏請復設此邑始割籍大竹居民庶富人材倍出視古爲盛邑東一里許有延福寺基址尚存因縣復而寺亦復焉其寺斷碣有詩曰長楠延閣影修竹闍鐘聲則當日之林木葱鬱宮殿崢嶸亦可想見室邇嗟雲隔詩清快以明又以見古之思賢深遠吟咏酬唱也未曰兩公金石舊行裏獨增情更可想見古人之重交情惜離別亦何不感慨三復也哉詩因寺

## 隣水縣志

卷之五藝文

六十三

而興懷寺因詩而壯觀今之視古猶後之視今此寺重建四十餘年正德己巳予與同志者借榻講易於此見其寺之正殿前門後堂退室左廊右廡柏杪筠篁周垣屏障無不潔精完好皆不費民財而住持所自製予輩甚愛之慕之因而歎曰僧流尚知重彼之業吾儒遊聖門學聖道登明科躋顯要視學宮如傳舍初不知崇本尚義較此寺此僧何如茲因住持請記其事予雖未盡知其詳而槩聞此寺之建始於縣之朱公瑩至于公福蒞任後宮殿始完寺外堦梯猶古未廢者惟道路未備

陰雨艱於泥濘判簿曹公璧用石甃砌往來始便初興  
工僧人興貴卒完功者興悟請記事者宗炳結緣工者  
國祥俱不可泯書於末是爲記

## 隣水縣志

卷之五藝文

六十四

延福寺經樓碑記

楊伯龍 邑人

城東雲臺山延福寺爲通邑禪林之冠其創始不知何  
代寺內有小碑題曰非菴廢於元末自明成化丙戌開  
闢縣治寺復建事載石碣至甲申之變流寇肆虐殿宇  
灰燼我

朝康熙元年僧洞徹與其徒九衢重建正殿兩廊並關聖  
殿寺遂煥然一新九衢復於寺北里許建佛來寺令徒  
孫續喜居住壬辰九衢圓寂寺兩廊仍復傾圮續喜乃  
慨然鳩工仍仿舊址稍加擴充于正殿後建豎經樓五

間始於丁卯迄庚午落成屬予紀之予乃至其地見其  
聳翠流丹巍然名刹及登樓憑眺左有金堦臥龍之勝  
右有崑樓海寶之雄遙望銀華之巔烟鎖雲封出沒隱  
現變態靡常俄聞樹間鳥語非絲非竹載好其音若與  
鐘磬聲互相應答颯颯動聽予與僧俯仰徘徊任耳目  
之所取美不勝收殆悠然別一天地噫斯樓也包羅富  
有豈但爲藏經之篋啖誦之場也哉余於是幸斯樓之  
復興而有以多續喜之功矣夫人情卽能振興亦往往  
始勤終怠或顧此失彼續喜先於佛來山構聚仙樓藏

## 隣水縣志

卷之五 藝文

六十五

經閣拮据閱二十餘載茲復有此建修俱臻完備洵緇  
流之傑出者也爰表而彰之

重修祝聖堂並置燈田記

舉人 楊伯龍 邑人

祝聖堂距華銀山頂五里巴渝鄰大長墊諸邑朝山者必先經此潔治身心虔誠拜祝且渴飲饑食俱於此少憩焉自明末兵燹後僅存遺址康熙年間僧普慧有志重修旋即圓寂令其徒孫源智於雍正九年復建金頂鐵瓦磚壁并募化重建祝聖堂上下二殿左右廊房以及莊嚴佛像又將昔年普慧所置鄰邑燈田如秦家壩保駕樓青石臺詹家堂數處撥歸祝聖堂永遠承管俾朝山之衆有棲息之所無枵腹之虞名山勝地可以歷隣水縣志

久常新矣事葺源智丐余爲記勒之石碣并將燈田各界至書之碑陰用垂不朽

新建佛來山藏經閣記

舉人楊伯龍 邑人

從來創始難守成尤難蓋守成必須善成夫先志擴而充之更有光焉乃爲可貴茲惟佛來山創自延福寺僧九衢以其地僻靜因名曰靜室建有正殿兩廊令其徒孫續喜棲息續喜復建下殿聚仙樓前建山門旁建倉樓滿堂佛像裝塑齊全猶以華嚴大乘諸經不可褻玩也特建經閣以爲藏經之所砌聚仙閣石堦以爲久遠之計凡兩廊之空缺者增補之柱木之朽腐者更換之共歷二十餘年之經營規模始備於斯時也藏經閣上

隣水縣志

卷之五 藝文

六十七

佛號鐘聲聚仙樓中香騰霧靄佛之來也舍此山其奚適耶則謂之佛來山也固宜予於本年夏秋之交偕友人至其地見夫林木蔭翳蔚然而深秀樓閣聳峙煥然而改觀及入山門登佛殿覩如來釋迦韋馱諸佛之式臨乎上下十八阿難之環列乎左右自覺油然而生敬徘徊瞻仰者久之旣而步其閣登其樓明牕靜几一塵不染四面風生俯仰憑眺之下遠而山色溪聲近而花香鳥語足以游目騁懷極視聽之娛有不禁心曠神怡樂而忘歸者矣然非僧續喜善繼善守大前人創修之業

而不敢告瘁曷克有此其功何可泯也予因僧之請遂爲之紀其事云

隣水縣志

卷之五藝文

六十八

重修萬峯山寺記

舉人 楊伯龍

邑東五十里許有萬峯山層巒秀拔迴接雲表其狀若龍蟠左右清泉環繞如溪山上有寺基三層上爲普賢殿下爲大雄殿山門廊房僧舍靡不完備明末兵燹後僅存廢址有僧永清自楚來鄰目擊動念立志重修乃先結菴棲息供普賢像有禱輒應乃繕簿廣募遠近無不樂施遂鳩工庀材上下二殿漸次完工佛像亦粧飾齊全斯時也廟貌嵯峨棟樑炳煥神旣得所憑依其所以降福於民人者正未有艾也永清於工竣後因余訪

先大父建坊遺蹟求記於余余曰茲山也天呈其秀地  
鍾其靈文峰疊峙於前後清泉湧瀉於左右真勝境也  
余大父總憲公向講學於此後職居清要捐俸修葺建  
立石坊題名尚在予薄宦歸兩袖清風愧無所助謹爲  
之勒石以垂不朽

## 隣水縣志

卷之五藝文

六十九

### 重修東門橋碑記

教諭 章闡然

嘗聞天下事摧折者固造物之常而補救者賴人功之  
懋觸類推之大抵然也鄰邑東門橋接聖廟西連城郭  
其來久矣曩時烟火輳集芟兩岸之荆棘決壅塞之泉  
流凡步趨絡繹馳驅載道者往往嘆前人修造之堅且  
久也迨兵火凋殘地廣人稀沿溪一帶盡屬荒烟蔓草  
芟決者既無人衝漬者復不少橋之圯壞殆有年矣幸  
荷我侯來守茲土蒞任未幾百廢俱興目擊斯橋尤不  
忍吾民之病涉也旋即捐金命工修造邇時我侯振作

於上紳士耆民樂助於下歡欣鼓舞如子來趨事不閱月而橋成通邑人士咸頌我侯之功大矣其德溥矣以至公至誠之心翕然而應之也而侯之大功不功大德不德直曰不過身先之已耳於我何與焉第觀遠近之奔走於杠梁者咸曰是橋也何前之廢壞日久者今忽一旦聿新也熙熙而來穰穰而去者各相忘於不自知耳爰鐫石以誌不朽云

## 隣水縣志

卷之五藝文

七十

修建廣濟橋碑記

訓導 周 衢

橋梁之利涉也尚矣國僑古遺愛也孟子以爲溱洧之濟不若杠梁之成良以濟有大小而惠與政聿分焉是亦平政之君子所宜致意也鄰之城北有橋名廣濟傾圮於明之末我

朝定鼎六十年於茲尚爾斷石沉潭荆榛滿目夏秋之交往來者沾裳濡首民之病涉匪伊朝夕矣甲申秋邑侯徐公枝芳來尹茲土修廢舉墜凡事之關於人文有利於民生者悉力行之而茲橋仍圮庠生甘惟屏躍然曰



我侯於地方事知未嘗弗行行未嘗弗力此橋之不復也侯未知也爰以簿進侯果慨然許之隨捐俸以爲之倡紳士商民相與觀感興起不閱月工竣甘生謂是橋旣復濟從此廣矣而謂可泯沒無傳乎因丐言於余以誌不朽余曰濟人以大德不以小惠孟氏言之矣斯橋之復誠濟之大者也謂非平政之君子烏能事事恆人有如是哉異日者侯秉國鈞凡所以衽席兆庶磐石國家者已於今日兆之矣功德豈僅在爾鄰也哉因援筆誌之

## 隣水縣志

卷之五藝文

七十一

重修長安橋記

舉人 馮志章 邑人

環邑皆山也邑東二十里許有河焉奔騰澎湃於衆山之中爲東道要津夏月常病涉勝國時有橋曰長安兵燹後斷鎖斜梁亦有年矣康熙甲申年徐公來宰是邦政通人和百廢俱興因公經此見之旣不欲吾民之褻裳而尤恐吾民之濡首也爰捐囊俸命里人鳩工而復新之不匝月間工竣第見水漲桃花咸歸瀉蕩流波泛溢羣咏乘空雖然橋長安矣人知是橋之長安而不知其所以長安是橋者伊誰之功也昔李冰治蜀造七星

橋上應七星至今猶昭昭耳目徐侯是舉夫豈出其右哉鄰民飲德思報矚記於余余躬際其盛爲之歌曰鄰山蒼蒼河水泱泱徐侯之功山高水長

隣水縣志

卷之五藝文

七十二

重修永安橋小記

舉人 吳存琚 邑人

天下事每待人而後興我思古人蒞一官於其事之有關夫國計民生者必毅然爲之窺其意以爲必如是而後無愧於爲人臣無愧於司民牧也然而求是人於道德中則易求是人於利祿中實難若邑侯徐公道德中人也侯甫蒞任百廢俱興不可枚舉卽橋梁一事其重新者已三四見矣邑中父老私相謂曰昔之傾圮非一日今之復修不崇朝天下事果待人而後興也茲復慮芭蕉河山水洶湧大病行人雖舊有橋久已石梁荒斷

湮沒碧潭遇夏秋之交往來行人稽滯水濱因捐俸鳩  
工建之匝月告成題其橋曰永安繼自今人慶安瀾矣  
非大君子烏能利濟有如是哉是誠無愧於人臣無愧  
於民牧矣吾知當時佩之奕世傳之其澤遠流長者蓋  
不啻此河之長畱天地間也是爲記

## 隣水縣志

卷之五藝文

七十三

重修鄧家河橋記

楊伯龍

嘗思天下事衆人共爲之恒易一人獨爲之則難夫以  
一人而成利濟之功一時而造百年之福在丈夫輩尚  
多慳吝而不肯爲矧一孤孀嫠婦慨然爲之而不惜此  
亦古今之所罕覩者矣邑東四十五里有鄧家河橋一  
道上通竹達下接巴渝往來孔道也從前原有石礮水  
衝木擊難以砥柱中流橋之傾圮殆有年矣乾隆辛未  
里孀李張氏痛翁姑之雙亡傷夫男之俱歿煢煢幼孫  
方在襁褓因力行善事慨然以斯橋爲己任獨捐己資

八十餘金越兩月而橋工告成自茲以往橋石堅完行者無憂病涉其濟人刊物之功豈淺鮮哉橋成氏之親鄰欲爲之記以屬余思陰鷲文帝君垂訓有曰修數百年崎嶇之路造千萬人來往之橋又易曰積善之家必  
有餘慶氏之建斯橋也善念感通神靈庇佑匪但保茲幼孫成立而瓜瓞綿綿子孫振振永享福壽於無既矣是爲記

## 隣水縣志

卷之五藝文

七十四

### 修七孔溪橋碑記

貢生 屈鳴介

嘗聞地之創興也必待乎時時未至雖經營慘淡徒勞罔功時既至人自隨之天自應之卽極之勢處艱危而亦不能中阻予於斯橋決之溪介治西百餘里東北兩川要津也泝流而上不百步舊有亭橋創自雍正八年歷今五十載兩岸鵲木摧折殆甚雖爾時猶便行人而勢則幾危矣先年予父志切創修已經募化因有所阻而卽詘然中止非怠於圖終蓋以時之有利有不利也甲午春正予父已作古矣而斯橋之創修遂無有計及

者予亦累於家窘而惟徐以俟之丁酉冬予赴秋闈返  
巴邑老僧字若凡與先父同庚友謂予曰汝父欲建此  
橋不果汝當倡修以慰親志予年邁不能董厥事願捐  
百餘金以助之越翼日予表兄艾君敬文亦復云然不  
惟樂捐若金干且直任倡化以成厥果商諸遠邇親友亦  
皆鼓舞樂從不禁欣然曰時至矣可無疑矣觀人事可  
以決天心矣於是約集羅君廷猷歐陽君彩璠蕭君學  
恒譚君萬清等修引募化匝月詳核簿數已得千餘金  
旋即命匠鳩工斯橋聿興非時既至而人自隨天自應  
隣水縣志

卷之五 藝文

七十五

乎雖當戊戌旱魃爲虐己亥斗米二兩餘金而預備有  
資亦不爲患非時既至卽極之勢處艱危而亦不能阻  
乎况久沐

聖朝深仁厚澤民間充裕蓋藏樂捐金貲者並不形其慳吝  
也先儒云識時務者謂之俊傑予豈敢謂有達觀之識  
特於斯橋會逢其適也今而知世事之時未至不可強  
爲求時既至不可怠以棄也如是夫時哉時哉

修南門文筆塔碑記

教諭 高繼允

余少時讀韓魏公集論地靈人傑非謂人傑地自靈乃人傑由於地靈余初謂公之爲此口竒可喜之說或一時有爲之言及壯年遊歷四方見名賢孕育之邦及科第蟬聯之區山水必迥異於他邑其或稍有變更人文亦卽隨之升降歷歷不爽始信魏公不我欺也鄰水在宋明時代有達人登上第膺膺仕者未易更僕數至本朝則不獨捷南宮者無人卽舉乙科者亦指不多屈自雍正乙卯科以後六科則并舉乙科者亦無之矣余於乾

隣水縣志

卷之五 藝文

七十六

隆己巳夏秉鐸來茲土求其故而不得因念學至君求未有力田而不逢年者遂嚴立課程勤加訓迪復選其中秀良向學之士捐給饗飧親爲講貫庚午壬申中式之楊生甘生癸酉選拔之周生皆予及門士也私心竊幸其有效然捷禮闈者究未之見癸酉秋吾友陳君覲光以名孝廉來宰是邑興利除弊凡有裨於民生者靡事不舉而於文教尤所汲汲不屑隨俗吏步趨公暇時隨予出南郊見浮屠廢址謂余曰此地若建塔關於人文縣治非小也遂詢之邑人僉曰前代時原有塔自明

末兵燹後始傾圮但所費不貲一時難以集事故因循至今陳君遂倡復建之議首捐俸若干都人士亦羣相鼓舞聚腋成裘共捐銀若干命縣尉趙君世宏董其事起工於甲戌之秋訖工於丙子之夏巍然聳峙成一邑之巨觀復百年之舊制將見人文振起甲乙聯綿必什伯於今日而且駕宋明而上矣則人傑地靈之說不將益信而有徵乎邑人感君之德欲勒諸貞珉以垂不朽丐余爲文以記之余何敢以不文辭是爲記

## 隣水縣志

卷之五藝文

七十七

科甲題名碑記

教諭 雷 義

鴈塔題名其來由久矣自洪武迄今百有餘年其間由鄉舉而登進士顯宦一時流芳遠代耿耿而不磨也洪惟我朝設科取士無非欲得賢才以資世用矧學校乃育材之地風化之源賢才之所由出諸士子陶淑於斯收其放心養其德性興禮讓之風尚詩書之教而於聖經賢傳之旨又得師儒啟迪故能爭先勉進以期□□蓋自歷科以來有登第者向亦無聞焉今而多士翱翔雲衢頂背相望非偶然也實由於涵養造就之功抑亦

關乎氣運之盛士生其間遭際文明得預前選何其幸歟雖然登名甲第榮則榮矣猶當臚列碑中俾後之人莫不曰某科得人如此某科得人如彼艷羨於百世之下以爲科目之光苟徒藉此以榮身假此以媒祿無補於世貽笑於後則於今日之題豈不有負耶碑成僉曰宜序諸上虛其下以俟方來今在泮諸生果能奮勵厥志而以科目是期將見題名之記源源而來殆十百千之可繼豈特一二云乎哉故曰有志者事竟成予亦以是而望於後學謹用書示以勸

## 隣水縣志

卷之五藝文

七十八

### 重遊書巖記

知縣 吳乾亨

余於書巖蓋不勝流連而情深矣曩以烽火告警登陴抱鼓士馬擐甲而立凡十過其下而不克登勤王事也迨梟氛旣靖四境風恬始得恣情山水間隆慶元年冬友人張君鑑自南充來約爲勝遊三日一時興况超然千古至今思之尚畱戀於胸臆歷二年己巳春日余與幕僚江子凝雪陳子晴峰復約來遊清晨並馬出郊值陰雨四合山容黯然渡溪河見岸柳垂垂萬綠俱發花香草嫩爭來媚人平田鋪棋亂山開畫倚者伏者斷者



起者皆若故友羣相拱揖乃策馬穿林磬折而上有陽  
春谷三字卽余舊日書也因與江陳二子坐石畔談往  
事徘徊瞻眺古樹懸崖藤蘿繡壁碧映澗流游魚自得  
泉聲琤琤悠然可聽相與浮觴其下欲追向日揮毫聯  
句之盛而同坐江子方肆豪飲以巨觥酌之怡然立盡  
如以水之沃沙恐陳子不能作吟亦相與置之矣飲罷  
復由前徑而下暮煙初凝羣峰隱現馬上睇之如踵予  
之左右而相讓也比至城則箭下四十矣明日追思人  
生浮萍世事電沒曩昔至今數載之間如涉夢幻而蒼

## 隣水縣志

卷之五藝文

七十九

山不改白雲如故能無撫景流連而歛歛欲絕乎因援  
筆記之

華銀山小記

知縣 陳觀光

華銀山介巴合鄰岳四州邑間卽普賢成道處爲南幹龍分枝腰結蓋自棧道而南由保郡趨廣安州至廣鄰交界之大壩口其過峽處也由是而東綿亘三十餘里高峰聳峙爲凌雲嶺卽鄰城玉屏山主頂又西北四十里爲海寶山形勢孤尖壁立又西北百里三峰鼎峙卽華銀山也其最高峰土人呼爲寶鼎常有雲護非至晴明不能望見攀躋而上風力酋勁六月亦寒每年八月積雪四月始消止有宋明古剎其最高處寺以鐵鑄瓦

隣水縣志

卷之五 藝文

八十

釘以固之恐其隨風飛去也自是而南龍脉漸伏沿淪江復起而東下矣

遊銀鼎山記

高繼允

山居縣治東北隅負石而抱土爾雅釋山所謂崔巍者也土人呼爲銀鼎山莫詳其由丁丑春二月朔有八日積雨初霽風景清美因偕使君陳疋軒爲茲山之遊山麓亂石離離寒苔如髮初上見滿城緋桃嫩柳弄晴競妍心目豁然再上則境內諸山有若獅者有若虬者有若鳳軒翥者有曲如蓋真如幢干雲霄而特出森然如侍從羽葆者層見疊出雜然并興亦巨觀也歷百步許菜花滿畦陳君顧余而言曰菜所以佐百穀古人謂斯

隣水縣志

卷之五藝文

八十一

民不可有此色士大夫不可不知此味良有以也余應之曰使士大夫而果盡知此味也者則斯民之色應其有瘳乎相與歎息者久之側爲武廟道人若麋鹿呼之語則目駭而逸迺攝衣踰孔家巖入花叢中曉烟滴翠萬卉爭榮莫可名狀穿林直上琅玕青蒼微風過之戛玉琮琤冷然作空外想北折抵山巔有平石可坐因觴飲其上遠眺華銀海寶如數螺髻矗烟藹間近觀城郭室廬烟火草樹清溪流水平皆出履舄下噫亦快且豪矣夫人之居心易爲形囿故規畫尋丈之間揣摩跬步之

內構鬪攫擾展轉歸晝而莫之止使其冥然高寄脫然  
塵壒之表有不啞然自笑者乎古之人御風天遊視今  
日之樂當何如也已而淡月露木杪晚煙四彌下上空  
濛一色鳥飛喋喋燈火隱隱遂取徑下山相與轟飲抵  
午夜乃已是遊也得詩三首同遊者陳君疣軒張君映  
辰趙君聲遠主遊者則予也是爲記

## 隣水縣志

卷之五藝文

八十二

遊老君山記

高繼允

辛未春二月望後五日客有談老君山之勝者余遂策  
馬挾廿子青蓮王子阜偕往匪云恣遊聊欲假松雲山  
色一澆胸中磊塊耳出郭日融土潤紅雨亂飛遠近諸  
山積翠點點隱現蒼靄間約二十里鳥鳴花落清澗環  
繞連岡起伏林壑森秀各爭出其竒以相角非雲林輩  
所能彷彿也又十餘里踰臥龍坡削壁摩霄高峯突兀  
鳥道盤空羣山拱揖岩花舒秀野草含芳幾不知身在  
人世間矣峯迴路轉見武侯祠前邑侯徐公枝芳建也

更三十餘里倏見松蓋擎雲瓦鱗披露溪流環繞黛色  
參天則老君山也遂釋馬而徒攝衣鼓勇連步以上謁  
猶龍像於祠中二生爲余道其故實憩息古柏下嵐深  
蔭密淡旭弄影居然別一天地焉忽微雨洒林臯諸峰  
半沒白霧舒卷時侵眉睫飛雲當面化龍蛇之句猶未  
足狀其變也因浮白數觴方欲周覽其盛已復四面雲  
駛如怒濤奔馬接離換互聆之有聲二生速予下山至  
山腰則輕雷隱隱霏響萬葉霧絮交橫飄渺無際矣冒  
雨行昏霧中道甚滑每移足輒以力制之雖獲弗踣然

## 隣水縣志

卷之五 藝文

八十三

汗且喘矣雨止二生請由舊徑歸余念以雨故溪中之  
勝未及細討亦必稍寓目焉毋令溪山笑人鹵莽乃偕  
至溪畔所謂石船石牛石筆架山諸勝皆神工鬼斧非  
人力也遂躍馬而別旣歸明日迺爲記之

凍花井記

舉人陳加儒 邑人

鄰州有二井一甘泉一凍花甘泉在城中凍花在樵門外甘泉爲予族兄子卜氏有去宅五十步凍花爲予有去宅三百餘步二井味相次甘泉甜美凍花獨以清冽勝意者紛囂疎散地盤別故泉香亦異與予嘗北抵齊燕南踰江淮東走吳越矣金山在鎮江府揚子江心惠泉在常州府無錫縣爲天下第一予皆飲之歸來飲凍花井水或啜或烹嘗來初無二味乃知天下事求之遠失之近者類此井矣而不獨二井然也昔柳愚溪八愚詩凡愚邱愚溝愚

隣水縣志

卷之五 藝文

八十四

泉愚池俱買而有之且去家八千里外今予不貿於人而得井於百步之近較之柳愚溪便已多矣自鄰州設而井設鄰州廢而井不改閱千餘年不知幾更主人翁矣今日復爲余有井得主人乎主人得井乎二井良不偶然易曰井渫可用汲詩曰泌之洋洋可以樂饑予也生于斯飲于斯蓋優哉游哉可以卒歲時乾隆二十五年庚寅秋記

銀鼎山碑記

知縣 楊爲龍

嘉慶二年腊月余代庖茲土迄二年冬邪匪王三槐徐  
添德等兇惡逆天從通巴儀營一帶焚掠直抵渠縣之  
三匯過河滋害余會同教諭唐公名學聰縣尉陳公名  
鑒陟高崗搃險要於署後之銀鼎山起望樓集鄉勇製  
鎗炮修城濠以備不虞斯時也有謂三山兩漕賊莫之  
至也孰知警報時聞於十一月七日賊匪漫竄青崗南  
木穿心諸路而進所到之處木石俱焚烟氛慘逼目覩  
心傷午後賊騎四匹先向北門而前離城里許我鄉兵

隣水縣志

卷之五 藝文

八十五

胆識可人躲閃山窩乘其不意潛開一鎗首騎衝落所  
惜傷非致命竟被免脫惟奪馬一匹搶旗四面而已是  
夜該匪等胆敢公然下寨優觴爲戲卽於八九十等日  
焚

聖廟燬民居圍攻城郭截攔道路吶喊之聲環震上下幸民  
情穩貼睥睨緊密縱賊徒頂鍋挖石分門而來而我民  
執斧裹灰守墻以待賊計雖奸終莫能施也其於十一  
日也羣魍畢集勢甚猖獗正在危急之際旋有石稻場  
之鄉勇應召而來訂期而會殺賊弟屠賊婦斬首奪旗

不下數百而賊勢爲之一抑第賊情狡詐賊性兇頑雖連日遭戮而搬柴運竹之輩接踵登山者更復不少是以十二三等日木城成炮位就鉛彈交飛旗幟密布因而懽呼侮弄得意揚揚而朶口士卒不無失色豈知福自天迓民叨神佑我銀鼎山頭大炮轟烈一發而賊子魂飛再發而木城破裂三發而魑魅身屍堆橫嶺壑矣尤可喜者更得諸團繼至益增牆勇軍威護朶諸人爭趨城下拾薪舉火火到木燃於該賊得勝之處而一晝一夜概行灰燼然逆賊不馴愈敗愈熾是夜復集餘徒

## 隣水縣志

卷之五藝文

八十六

拚死蜂擁抬梯戴甌者動行數百負版圍皮者倏忽幾千惟是我民乘得勝之勢捍禦從容感神聖之威攻防備至炮無空發鎗不虛施越四更賊亦移營三里不復爲我壘矣其十四日也王三槐等陸續潛遁雖夤夜圍佈四門惟虛張聲勢空口唬呼以脩我追躡而已而我四城樓大炮隨呼隨擊聲起炮施所呼之地旋寂然無聲迨至黎明盡皆喪胆撤營而奔是日未刻大兵魚貫而來若乘此賊窮氣餒之候奮勇跟追鄉團橫衝截殺民藉兵威兵資民力殺三槐擒天德豈不在茲乎惜哉



種餉未至閒居三日鄰屬村場遂爲之蹂躪殆盡生民塗炭以至於斯良可悲也夫鄰城不陷固屬官民防衛之嚴而官民無虞皆由天佑神庥所致何也丁糧緩解火葯截畱非天佑乎至聖降令制邪陰增兵威非神庥乎余不佞不敢貪爲己力也屆茲樓成額曰視遠爰舉護垣之巔末而勒諸石是爲記

## 隣水縣志

卷之五藝文

八十七

紹庭義學碑記

舉人 廖 寅 邑人

學者莫先於立志志也者適善適惡爲利爲義之樞機也樞機正則莫不正矣樞機不正亦莫之或正矣孔子曰苟志於仁矣無惡也孟子曰鷄鳴而起孳孳爲善者舜之徒也欲知舜與蹠之分無他利與善之間也夫人之所以孳孳不已而卒至於舜蹠之分者以志爲之樞機也樞機之發榮辱之主也可不慎乎今之學者學爲科舉之文曰吾以取功名也夫窮經可以致用而科舉之文乃功令所關士人由此進身以行義而達道雖聖

賢處此有以異乎無以異則聖賢科舉吾亦科舉聖賢  
爲科舉之文吾亦爲科舉之文科舉同爲科舉之文亦  
同庶幾其無不同乎然而有說焉蓋科舉之文言聖賢  
之言者也言聖賢之言者必先讀聖賢之書立聖賢之  
志今之學者自束髮卽教之讀孔曾思孟之書欲其習  
而安焉以聖賢爲必可師也誠讀其書而心維口誦如  
聞四勿之語而請事則視聽言動皆有禮也凜參倚之  
見以書紳則忠信篤敬可以行矣戒愼恐懼之維嚴子  
臣弟友之必勉撫皆備之我卽反身求誠體立達之仁

## 隣水縣志

卷之五藝文

八十八

則能近取譬於聖賢言語句句體貼到自己身上來與  
呂伯恭讀躬自厚而薄責於人章卽能變化氣質相同  
如此是篤志聖賢而孳孳爲善者也一說也如不將本  
身上理會而徒加口耳之功讀之時第曰讀書講之時  
第曰講書聽之時第曰聽講書見游夏問孝則以爲游  
夏問孝也夫子亦教游夏而已不自思其於孝何如也  
見顏仲問仁則以爲顏仲問仁也夫子亦教顏仲而已  
不自思其於仁何如也以祿爲可干而置殆疑尤悔於  
不問以人爵爲可要而并不知仁義忠信之宜修一切

傳習倣倣不在聖賢一切剽竊浮華總求科舉是謂一語不能踐萬卷徒空虛書自書我自我也如此是繫藉聖賢而孳孳爲利者也又一說也夫言心之聲也文行之著也由前之說其爲文也行之而後言其言也必誠由後之說其爲文也言之而未必行其言也必僞同一科舉也同一科舉之文也誠者貴乎僞者貴乎行而有文者中乎文而無行者中乎且由前之說即使不中而以言坊行表之士安義命而樂獨善之身要以無愧乎聖賢況必中乎由後之說即使中而以言僞行僻之人

## 隣水縣志

卷之五藝文

八十九

憑勢位以制斯人之命或恐不利於國家况必不中乎是孳孳爲利者之未必利孳孳爲善者之未必不利也而志宜先慎矣朱子曰讀書志在聖賢爲官存心國家諸生讀聖賢書志聖賢志嚴義利之辨謹舜蹠之分佩四子之精探六經之蘊極學問思辨篤行之功以求格致誠正修齊治平之道鑒虛車之飾而設誠致行爲載道之文而銜華佩實是卽陸子所謂進於場屋必皆道其平日之學而不詭於聖賢者此而登之朝廷本學術爲經濟以不負君國不負所學是余設學紹庭諄諄切

廟之意若迺馳騫聲華雷同勦襲以爲譁世取寵之具甚或玩愒漫遊隣於暴棄知諸生亦無取焉始於嘉慶己卯夏庚辰延師開課每歲學租稅課以及田房地畝一切鈎稽出入襄其事者鄭子遠峰蘭余弟致堂桂香例得并書其學田界址房屋山場細冊詳載碑陰茲不具

## 隣水縣志

卷之五藝文

九十

復堂先生義莊義學書籍碑記

知縣

吳秀良

夫詞壇立幹每資蔭枕之功學海翻瀾宜藉鑽研之力張安世三篋無遺詎由夙慧裴逸民五兵足耀豈曰謏聞坐擁城而藏富胸羅斗以舒光挾雲漢之章郊島咋舌選山川之勝賈董饜心樓成威鳳必尋聯步之枕囊貯流螢不照書空之字固知珠璣錯落唾咳風生抑且黼黻昭回肺肝泉淪矣然而羽林路杳青簡難窺委宛山高丹文孰啟梯天祿於層霄自傷孤賤訪謨觴於秘窟遙隔仙凡况夫梨棗工繁縹緗價重古典紛陳莫擘

五雲之紙異編雜出何來一束之縑採驪珠於稷下購  
必兼金索蠹簡於虞初緣慳拱璧此則家徒壁立祭獮  
無方几盡塵封雕龍乏術縱復燃糠映雪啣豹管之迂  
疎孰其充棟疊牕聚虹文而作育哉先生學號通儒人  
推國士由弦歌宰作柱石臣當櫓槍之遙指兕突孤城  
望烽燧以頻驚鴟鳴舊壘迺先生夙諳韜鈴握算而棋  
坪整暇能馴組練談兵則表帶從容罪人斯得慰九重  
宵旰之憂大憇旣殲靖千里甲兵之氣民食其福翦此  
蘖芽

## 隣水縣志

卷之五藝文

九十一

帝嘉乃庸酬以鐘鼎擁旌章貢沛霖雨於桃江建節淮楊扇  
清風於瓜步

天子方眷彼隣圖重旬宣於屏翰先生乃息茲鵬翮寄笑傲  
於林泉歸舟風駛鬱林之石無多故里雲荒彭澤之樽  
猶在時先生之長君候補道思芳亦已化去次君候補  
分府思莊并其孫刑部郎中均內館校錄臯類皆美質  
瑰竒英資颯爽不吝於施能見其大先生於是慕蘇太  
傅之高標闡揚先志懷范仲淹之良法佑啟後昆建義  
莊而嫠婦遂生崇鄉校則童蒙養正其意美矣其德厚

矣乃復出其藏書貺夫末學擷菁華於汲郡帙已盈千  
萃絲竹於孔堂卷將纍萬玉箱金板都從鶴俸攜來七  
畧九流不假羊修借得鄴侯架滿籤映月以鐫牙曹氏  
倉多□臨風而織綺陟玉屏之突兀恍入嫿嬈瞻銀鼎  
之岿巍如摹科斗但使芸牕午夜嘗聞春誦之章便教  
茅屋三間一洗冬烘之陋津梁不遠何妨橐筆而遊文  
獻可徵共許焚香以對秀良性耽白水漫賦鳴琴世守  
青箱稍能辨字願鄉國毓芝蘭之彥當有翰林主人爲  
聖朝廣棫樸之祥須識山中宰相

## 隣水縣志

卷之五 藝文

九十二

重修城隍廟碑記

萬歷三年

教諭

王之藩

雲南人

余嘗讀大明會典凡天下郡縣皆設城隍取其號而封  
之所以佐理陽政鑒察司民衛護一方之總總林林也  
鄰水舊有此廟在東北隅去縣僅半里許邑之人歲時  
伏臘有事於祈祝禱祀者咸往焉第基址不宏居雜民  
處兼以傾圮不葺公私不稱便者久之然亦未有加意  
改圖之者萬歷乙亥翼城侯公以西晉賢科來令茲土  
履任之日恭從儀典宿齋見其廟貌荒隘匪以綏神卽  
欲恢拓之廼捐俸金買縣治中地基一段形勢寬展復

導鄉約老民倡義舉採木於野取礪于石冶陶冶營  
辦圖維建修正廟五楹高廣峩然復置內寢二柱增塑  
神像近瞻而遠眺之者莫不起敬畏嚴憚之心兩廡共  
設十二司以出入糾察門左右新立陰陽監學至於致  
齋所化錢庫塞門石罔不次第舉之金璧輝煌丹雘彩  
飾煥然一新而祈報者無虛日焉此豈有激而然哉幽  
明之分雖殊感應之理則一惟公以聰明正直之體合  
於神明彰善癉惡一以至公無私者有以通幽明之故  
以是人禮神而益謹神依人而益靈祈報并祀南壇春

## 隣水縣志

卷之五藝文

九十三

秋主祭邑厲引綿裡祀於不窮者胥以此爾鄰之士民  
仰神之威感公之德復荷邑佐楊君銓判簿趙君仕瀛  
嘗輸穀粟以濟厥美廟成屬予爲文以記其事則神威  
靈佑國家之休侯公表裏陰陽之政諸君贊襄董率之  
功當與此廟同爲不朽矣

重修文武二聖廟碑記

知縣 吳秀良

日星河嶽之精昭明於上而亭毒於人所儲者厚所受者正其口也道統賴以續大義藉以伸舉古今立德立功之事皆有以造乎其極而非擬議之得而名迨其歿也天下惜之思之於是乎設其位肖其像曰師曰帝曰聖曰神信之深斯尊之至也我

國休養生息涵濡於百數十餘年之久而崇德報功之典隆鑠懿茂益臻美備自京師以及蠻貊荒裔之遙奉文廟必奉武廟籩豆冠裳登降之儀用肅牲牲酒醴春秋

隣水縣志

卷之五 藝文

九十四

之祭以時而且蕃藻芹于術序童儒傾心剪萌蘖于疆場夔魍斂跡羹而化之以迄於不可知其流行於天地之間而無日不存於人之心目者不可強也鄰邑僻居川北一隅岡連嶺複萬山環翠鴻律蟠采人文蔚興簪紱之家科第之榮照耀史乘不絕於書其爲聖神之垂佑亦有年矣嘉慶丁巳冬教匪王三槐等作亂蹂躪焚掠者殆數十州縣鄰邑非有高城深池之險而壘已編於四郊圍難困於七日藐茲彈丸誰遏守陴之哭勢如纍卵行將聚族而殲卒也石礮衝飛兵疑天降中其渠



魁賊乃遁去水火再蘇室家相慶是又聖神之呵護鄰人匡之翼之以免於危而不徒在文物聲名之盛也邑之文廟在東門外武廟在城內中街規模既隘歲月亦湮樓廡剝於風雨殿楹翳彼墟埃軍興以後井里凋敝邑之人士復業未久念鋒鏑之初離而不能支也官斯邑者蒿目時艱痛瘡痍之甫振而不遑計也癸酉春余以館敘補授斯今年穀屢豐民氣和樂爰屬紳耆而謀所以新之者衆皆喜而諾之余首先捐貲以爲之倡其城鄉捐數之多寡聽其所樂而輸焉議既定乃爲紳士

## 隣水縣志

卷之五 藝文

九十五

立一局或司出納之簿或任催收之勞或採購木石或稽查工匠綜先後而計之鏹溢將及萬金落成亦幾四載矣夫修舉廢墜以答鴻庥有司分內之事也而紳耆之爭先踴躍聞風景從局士之分任勤勞無間寒暑是則不可泯也已卯夏將鐫石以彰好善者而冠之以局士乃述聖神之所以福吾民及吾民服教畏神之實心以爲之記余固卜吾民之蒸蒸日上也抑又思之佛老之徒百工技藝之末猶知所本尚能璇璠其室金碧其容饗侑而歌舞之奔走竭蹶惟恐後時余與紳民遊聖

神之宇沐浴遺澤而何靳焉後之過斯廟者瞻棟宇之穹窿聽鼓鐘之響應其亦有惻然動心者哉

## 隣水縣志

卷之五藝文

九十六

重修文武二聖廟碑記

邑舉人 夏貢廷

夫治民事神司牧者之任也故立政貴握其要握要以圖之此非一時之澤而數世之澤也邑之文廟在治東門外創於康熙明府李公越百數十年或補葺或增修或塗以丹雘其本末年次俱載邑乘第是時特草創規模繼而因陋就簡自教匪蹂躪幾遭烟燼矣武廟在縣中街亦李明府所建地勢高聳風霜易蝕兼春夏之交水衝土委皆爲廟患其何以要諸久遠夫一邑之聖廟一邑之文風係焉廟不足以妥神有父母之責者豈能

釋然乎哉賢侯吳公來守是邦一以忠厚長者之道待斯民斯民亦以忠厚長者之道自待不期年而廢者興墜者舉惟文武二廟未及補修但功程浩大動以萬計侯慨然捐俸數百金先爲邑人倡一時都人士咸生感激樂爲捐輸邑之董其事者旋命匠鳩工實心辦理數年之間朝夕不敢怠則侯之感人深矣兩廊之成雖仍舊址因實兼創文廟如大成殿崇聖祠兩廡鄉賢名宦各祠煥然一新其氣象至於戟門櫺星門圍礮泮池石屏丹垣等處尤極壯麗宏敞眞盛舉也武廟形勢險兀

## 隣水縣志

卷之五 藝文

九十七

尤難措手落成後觀者以爲天造地設迥殊舊制是誠足以妥神也是誠足以慰賢侯治民事神之心也雖然人知廟之成不知廟之所以成侯之治鄰有三異焉改瘞枯骸鬼亦知感一異也土木方興屢獲豐年二異也廟將落成文武生聯邀鄉薦三異也侯之流澤長矣後有登巍科列顯宦者亦可溯其由來之有自是爲序

鄰州二聖廟記

陳加儒

鄰州古治也山則峽谷平台啟其秀水則石船玉帶宕其竒自梁大同闢城以來宕渠諸邑屬焉由隋迄唐至于元季統治巴西號曰雄鎮舊有川主文昌神祀霽皇典麗默受康寧泊前明成化間裁州設縣治遷銀鼎而神祀遂廢蓋三百年於茲矣幸生盛世沐浴

帝澤我曹宅斯土者沿江左右千百其家仰荷神庥旣繁且祉而歲薦胼蠻除墀而祭深爲缺典歲庚寅奉功令有修復廢祀之條於時竹鄰父老聚而言曰鄰州二祀

隣水縣志

卷之五藝文

九十八

一新厥宇在今日也衆議云何皆曰唯唯指揮惟命咨誰領袖者僉推包公肖楚查君治安暨予三男陳藻更簡幹畧諸士二十餘人各持簿書人胥用勸初募梓里捐金若干再花商行客子母銀會捐貲若干又料量平角斗甬積羨復若干乃召陶師范土焉磚十萬瓦如之薪火之供吉安陳君爲之倡而伐木丁丁不吝斧斯者又若干其人嗣是規地八十餘丈兼造街房置園圃以爲祈年廟祀之需百舉胥興適蜀中有金川役暫罷止踰二年金酋平藻復經理前事不料天乾己亥十月齋

志以沒幸時中同蓮等不替厥工也曰山虧九仞是棄山也井不及泉猶棄井也盍成諸衆曰然願効役締于庚子八月鳩工庀材南山之岡取石焉沿江上下烝徒楫之石工不辭瘁也懸岩峭壁取木焉是斷是遷是任是負木工不憚勞也曲折匠心經營慘淡於辛丑之五月而新廟落成鏤刻前庭丹黃後殿城以文階封以磚垣巍然煥然啣遠峰而吞長江宛與鄰州山水共爭竒勝比者入廟趨蹌我將我享神罔時怨神罔時恫良有以也俾爾戩穀俾爾單厚當不徒然况夫歲時伏臘率

## 隣水縣志

卷之五 藝文

九十九

吾曹衿士憲老乞言飲射讀法觀于鄉而知王道之易易也更進英俊子弟課業于斯仿鶩湖鹿洞規條懸書四壁俾知嚮往末俗囂凌之習庶有豸乎瞻斯廟也禋祀以舉文治以興寧非吾一鄉盛事哉記曰有其舉之莫或廢也又曰淫祀無福二祀正祀也以勞定國法施于民今日者寢廟旣成昭典禮厚風俗于是乎在借曰召釋子引緇流比之旛利寺觀演貝葉之梵言諧士女之懺會其褻已甚概所不取第我曹哀多益寡拮据十年計地值七千餘緡磚瓦三百緡陶工二百緡街房園

圍二百緡共計一千五百緡集腋爲裘者竹鄰父老子弟瓦泥封闕者四方行商過客以薪以蒸助我陶工者鄰山諸族人士而不作振興董治斯役者前則包公肖楚陳公帝符范君正海查君治安陳君謙益范君周建余三男陳藻字粹中後則有包君時中范君孔廷陳君鏡如包君中華范君子謙劉君德尊陳君禹謨余四男陳宅中五男陳蓮字直中也勒之貞珉于以不朽是爲記乾隆四十七年壬寅孟冬

## 隣水縣志

卷之五藝文

一百

紗帽石記

馮學濬

寺外有石如紗帽乃振古以來生成之物也曩者嘗夢身遊其處有物焉青鳥而圓狀浮于水面其下窈然無底拂之輒動使人心悸而膽落道光十三年癸巳予攜匠刻前人風景之詞寺僧告曰門外紗帽石于昨年六月值天時暴雨石移下數武深數尺往視之良然因嘆曰凡宇宙間星隕地震沙飛石走者不知凡幾故滄海且變爲桑田高岸或淪爲深谷而況于此石然旣以紗帽名則必有關於風氣不可以不誌也故余于石額上

刻有開必先四字此後遂不復夢

隣水縣志

卷之五藝文

一百一

隣水縣志原序

郡守 袁定遠

隣水首連夔達尾引巴渝爲果州巘邑海寶崑樓峙其  
北岷江墊水會其南自昔風氣所鍾英華所出彬彬乎  
稱盛美矣迨寇賊凋殘後人烟寥寥風景寂寂迄今登  
卧龍之坡而望玉屏之勝問當時衣冠禮樂之盛猶有  
存焉者乎吏茲土者守殘救敝日不暇給又何遑及纂  
輯之事此一邑之誌遂至湮沒無傳也不佞忝守宕渠  
距鄰三百二十餘里其邑之土田貢賦山川人物吏治  
民風旣不能親履其地而稽其故又不能與其長吏時

時晉接共相究度雖古今興革風俗淳漓人材盛衰政  
治得夫已登省誌亦多未詳倘

聖天子陳王會之圖而考職方之掌將何以報載乘缺失誠  
守土者之責也閩浦徐令於甲申秋抵任以英才剴庶  
政文學飾吏治扶偏舉廢迄有成緒遂念邑之土田貢  
賦山川人物吏治民風不可無所考信乃諮詢耆老搜  
採遺編裒成一書雖文獻無徵未免掛漏而大略已具  
可備異日輶軒之採而襄國史之成且使宰是邦者酌  
古準今懲前毖後以求盡善則不佞將與同事諸君子

## 隣水縣志

卷之五藝文

一百二

共勉之矣



鄰水縣志序

知縣 徐枝芳

鄰之失誌也久矣甲申秋予甫下車卽與邑之紳士求誌書非徒爲修補之計亦欲得前言往行而私淑之也諸紳士唯唯否否及遍訪老成斷簡殘編茫無一得是鄰不以誌書爲急務予亦姑置之而未及叅稽今奉府憲搜討各屬遺蹟以成一部之全書甚盛舉也予又何敢辭勞而與鄰人同目爲不急之務哉爰徧採古碑石坊及邑之世族鄉士大夫俾各舉其所知而大畧纂爲一集信者必錄疑者寧闕以俟後之君子云

鄰水縣志

卷之五藝文

一百三

鄰水縣志序

川北道 劉 益

夫事有似緩而實急者郡邑之志是也蓋在上古之時九州卽有志乘而周禮爲設官以掌之豈不以吏治莫要於彰善癉惡以型風俗哉是故書於申明所以癉之使戒也勒於竹冊所以彰之使勸也故夫志之爲書義同乎史而用關乎激揚之大當其修輯精詳足以鼓吹休明有裨政治焉余觀察川北之明年鄰水令海昌陳君走書來告曰鄰爲邑三百年矣其間忠臣孝子義夫節婦與夫掇巍科登顯仕之實代有其人而向無志書

文獻散軼康熙中邑令徐某甫經纂輯卽去任所得不  
過郡志之一二某視事後循行鄉里詳訪諸父老所遇  
荒碑斷碣必披拂苔蘚手自鈔錄並觀其山川稔其民  
風搜羅四載幸已編輯成帙將付剞劂願敘之余聞而  
色喜以爲蜀處天末又遭明季兵燹之後戶皆新集野  
無遺老故其僻遠州縣牧令雖有志邑史誠有難于措  
手者惟是名賢軼事貴在闡揚而我

國家教養百有餘年郡邑之人物聲名彬彬蔚起者所在  
皆有何可以前無所踵視爲緩圖使士民觀感無自乎

## 隣水縣志

卷之五藝文

一百四

今陳君能不憚勤勞創成是志後之來宰是邑者將按  
其冊而稽之曰幅幘若是其遼濶也山川若是其崇深  
而險阨也風俗若是其淳樸而未能盡然也忠孝節義  
科名仕宦若是其輩出而未有已也可以風民可以範  
士是一下車而可知四境之情形因知所以治是邑者  
皆將於陳君乎是賴也不信有裨哉余忝以巡省表勵  
爲職則志序之作雖不吾請猶將爲之矧其請乎故爲  
論志乘所關之重述陳君纂修之力以弁其書首蓋謂  
陳君所修必能精且詳也其治鄰也殆能有意風俗而

盡職於彰瘕者也能知務也不緩所急也可嘉也已是  
爲序乾隆歲次丁丑秋七月撰

隣水縣志

卷之五藝文

一百五

重修鄰水縣志序

兩淮  
運使 廖寅 邑人

志者志一邑山川之風俗也山川不易者也而所以維  
持乎風俗使之淳而不澆樸而不侈與山川生色者則  
惟視教化爲移易教固不重哉周禮大司徒以鄉三物  
教萬民而賓興之其以德行道藝爲人心所固有因而  
教之遂成爲風俗歟吾鄰舊有志書讀之覺山川之秀  
鍾爲竒杰仰止前徽蔚爲風俗矣嘉慶十七年之春大  
修省志邑侯吳公因增入舊志後事以應而以爲未盡  
善也屬余核定余老矣曷能爲役於是邑紳士公請千

邑侯王公延上舍曾君樸菴主其事樸菴端士也心摹手訂序次一依舊志而增入者毋濫毋遺事歷三任成經一手可謂有倫有要也現呈邑侯陳公閱序定行屬余述其崕略以諗來者余維舊志閱今六十餘年矣山川猶是而風俗之遞嬗安知不異於古所云然卽今制府蔣憲恭行節儉屢經化導本年復奉通諭云上年欽奉

宗睿皇帝聖諭以崇儉黜奢爲阜財善俗之先務今又恭逢皇上不邇聲色不殖貨利

## 隣水縣志

卷之五 藝文

一百六

御極之初諭令民間婚喪等事務遵定制而行勿任蕩費資  
產仰見

聖心愛育黎元無微不至特將通禮會典及律例所載婚喪服用等事摘出簡明條款示諭以便寓目改勉等因奉此而吾鄰紳士卽遵照憲諭翕然同心去奢去甚議爲條款請於官著爲令於是下令如水之流一時世家大族當大事則百日齋戒盡心附身附棺殯殮卜定無坐夜約弔者而民間婚配具禮從儉一切慶弔饋賻遵照條款無過食品無過四器喪事無坐夜雜擾數郡畢至

者凡而服食器用亦漸守分守樸罔敢僭差美矣哉風俗與化移易其神且速固如是哉羅豫章云朝廷有教化則士人有廉恥士人有廉恥則天下有風俗不信然與吾於是益信吾鄰士習民風駸駸而及于古不難也孔子曰里仁爲美擇不處仁焉得知又曰十室之邑必有忠信如吾不如吾之好學夫里也十室也聖人猶美其仁而必其有忠信况吾鄰也哉吾儕生當盛世知里以仁爲美而擇之處之知忠信之質足貴而學焉好焉日以

## 隣水縣志

卷之五藝文

一百七

皇恩憲德黜浮崇雅之化摩厲乎風俗使比閭族黨所見皆仁厚樸儉之風所聞皆仁厚樸儉之訓習而安焉有不如是者則相與恠之此與古六德六行六藝之教何異由是人心一歸於正而澆漓無自而生有不道德一而風俗同哉於以追踪前列增重山川共爲郅治之良以無負諸賢侯殷殷修志之意也何有道光元年小陽月  
撰

重修鄰水縣志序

李維英

縣有志國有史皆勸善之書也然體例不同史則善惡並書如春溫秋肅志則隱惡揚善如春風長養故作志者但舉其善者而表彰之卽孔子舉直錯諸枉能使枉者直之說也而忠厚之道寓焉矣鄰水舊志體例甚備凡名山勝蹟忠孝節義之事志之詳矣何事重修爰嘉慶初年邪匪作逆其間死節死義者甚多雖經重輯當兵火之後採訪未周志成復有所訪聞夫以忠孝節義之重偶有遺佚此又鄰人士所心傷而不忍湮沒者也

鄰水縣志

卷之五 藝文

一百八

况閨閣賢媛數十年來又多可旌可獎是以重加採訪修輯俾後之閱是書者知忠孝節義之事人盡可爲而不必讓美於前也書成問序爰贅數語於簡端益見鄰人士之樂于闡揚善類焉道光元年孟冬月中浣撰

重修鄰水縣志序

貢生 熊文樓 邑人

六經而後載籍如林史與志尚矣史以紀歷代氣運之盛衰政事之得失君臣上下賢否悉書褒貶以寓具二體備三長史之善者亦可以爲經然必在朝文臣奉命纂修非是則史而野矣至于志其出自史官之手者雖志卽史下此直省州縣類皆有志凡山川風景城市祠廟土田賦稅人物生產古蹟文藝罔弗臚列因之採其尤著者爲郡志爲省志且爲一統志則州縣之志誠不可少矣鄰邑古無志

鄰水縣志

卷之五 藝文

一百九

國朝乾隆二十三年邑侯陳公觀光爲之創始綱領條目燦然畢具山陬僻壤文獻足徵洵善本也越今相距六十餘年前之所無者後之所有中間所宜增補者不勝指計嘉慶十七年奉文重修縣志時邑侯桂林李公屬廣文蔣公操簡牘事稿成賚憲報可然規模雖就遺漏尚多嘉慶二十三年邑侯椒南吳公屢議詳加補正付之剞劂旋以調署太平廳暫稽其事今神木王公以司馬攝篆茲土興廢舉墜當務爲急因集邑紳士議定工費听出詳明制憲舉行開雕復加意採訪一切可入志

者俾無泯沒聘邑樞菴曾君繼楠入局掌稿並書樞菴  
固拔俗之士學富才優得其人矣閱數月稿成質之總  
纂王子芾先生陳沃堂先生李雲樵先生廖復堂先生  
俱無點竄咸稱善焉然後楷書附梓厥功告竣此志也  
無善不彰無美不備綜核名實質有其文真足信今而  
傳後與史並垂不朽矣樓忝與校字謹列數言以附於  
諸先生大序之後

## 隣水縣志

卷之五藝文

一百十

### 鄰水敬鄉錄序

陳加儒

吾鄉自建邑以來越三百年矣

自明成化改鎮爲縣說

先達輩出

閨閣名媛代不乏人迨兵燹後邑誌灰燼寢焉無聞稽  
古者惜焉

國朝鼎興邑尹徐公纂誌事屬草創紀載從畧及乾隆二  
十二年海寧陳公復修邑誌鄉達廣爲搜羅叅閱郡省  
通誌得宋元明縉紳諸公捷南宮登賢書者若而人晉  
顯秩贊畫謀者若而人隱逸恬退姆儀閨範者又若而  
人一邑文獻其在斯乎獨是纂述之難也遠者無論如



明際末運巴蜀凋殘流寇入鄰十室九空其時引義裁  
決者果皆悉錄與婦女節烈者果皆盡登與年久湮沒  
考証無據一時秉筆多從簡畧留心人物者何妨逸爲  
叅補與昔余宰宣平跡其邑之遭變與鄰同缺誌亦同  
因廣爲披輯剏修邑乘表微闡幽輿論悉協桑梓之邦  
轉切皇然用咨故老續加叅補除邑乘已載外據所見  
聞復得若干人入誌未詳者詳之遺行未闡者闡之閨  
門節烈松竹筠操未經表出者表出之臚列搢紳亦採  
耆庶事增乎舊而人尚從畧私心竊計星漢在天不難

## 隣水縣志

卷之五藝文

一百十一

指數岳瀆在地亦止七八而兩大之精華已畢洩於是  
古今來未嘗少之是集也予開其端繼此者漸次筆記  
遺珠之嘆又何患焉惟是私阿所好識者非之予所不  
敢凡登一人再三裁酌其有名掛鄉井置而弗錄者不  
無微意蓋欲發潛德之幽光昭示來茲以待後人故寧  
謹無濫焉爾